


元史

卷四十七
四十二之

内閣文庫		
番號	漢	1836
冊數	500 (470)	
函號	列	10 1



元史卷四十二

本紀第四十二

淺草文庫

皇明翰林學士亞大夫知制誥兼脩國史臣宋濂

翰林待制承直郎同知制誥兼國史院編脩官臣王禕等奉勅脩

順帝五

九年春正月丁酉享于太廟癸卯立山東河南等處行都水監專治河患乙巳廣西徭賊復陷道州萬戶鄭均擊走之丙午命中書平章政事太平花提調會同館庚戌太白犯建星辛亥太白犯平道二月戊辰祭社稷辛

康熙二十五年重修

元史卷四十二

本紀

四十二

元史卷四十二 本紀 一
已太不花辭職不允甲申太陰犯建星三月丁酉填河
淺溢以軍士民夫各一萬濬之己亥太白犯壘壁陣已
已命大司農達識帖睦迺爲湖廣行省平章政事是月
河北潰陳州麒麟生不乳而死徭賊吳天保復寇沅州夏
四月丁卯享于太廟丁丑以知樞密院事欽察台爲中
書平章政事己卯以燕南廉訪使韓元善爲中書左丞
立鎮撫司於直沽海津鎮壬午以河間鹽運司水災住
煎鹽三萬引是月車駕時巡上都五月戊戌命太傅脫
脫提調大幹耳朶內史府庚子詔修黃河金堤民夫日
給鈔三貫辛丑罷瑞州路上高縣長官司庚戌命翰林

國史院等官薦舉守令丙辰定守令督攝之法路督攝
府府督攝州州督攝縣是月白茅河東注沛縣遂成巨
浸蜀江大溢浸漢陽城民大饑六月丙子刻小玉印以
至正珎秘爲文凡秘書監所掌書盡皆識之秋七月庚
寅監察御史幹勒海壽劾奏殿中侍御史哈麻及其弟
雪雪罪惡御史大夫韓嘉訥以聞不省章三上詔奪哈
麻雪雪官出海壽爲陝西廉訪副使韓家訥爲宣政院
使壬辰詔命太子愛猷識理達臘習學漢人文書以李
好文爲諭德歸賜爲贊善張仲爲文學李好文等上書
辭不許賜公主不荅昔你平江田五十頃甲午以也先

帖木兒爲御史大夫乙未以湖廣行省左丞相亦憐真班知樞密院事丙午太陰犯壘壁陣癸丑太陰犯天關甲寅以栢顏爲集賢大學士乙卯罷右丞相朶兒只司前爲國王左丞相太平爲翰林學士承旨是月大霖雨水沒高唐州城江漢溢漂沒民居禾稼閏月辛酉詔脫脫爲中書左丞相仍太傅韓家訥爲浙江行省平章政事庚午以也可札魯忽赤搠思監爲中書右丞同知樞密院事玉樞虎兒吐華爲中書參知政事辛巳詔赦湖廣獠賊註誤者戊子命岐王阿刺乞鎮西番八月甲辰以集賢大學士栢顏爲中書平章政事河南行省平章

政事月魯不花爲宣政院使庚戌以司徒雅普化提調太史院知經筵事是月車駕還自上都九月甲子凡建言中外利害者詔委官選其可行之事以聞丙寅命平章政事栢顏提調留守司丙子中書平章政事定住以疾辭職不允辛巳命知樞密院事亦憐真班提調武備寺丙戌熒惑犯靈臺是月遣御史中丞李獻代祀河瀆冬十月辛卯享于太廟丁酉命皇太子愛猷識理達臘自是日爲始入端本堂肄業命脫脫領端本堂事司徒雅普化知端本堂事端本堂虛中座以俟至尊臨幸太子與師傅分東西向坐授書其下僚屬以次列坐十一

月戊午朔日有食之戊辰太陰犯畢宿庚辰太白犯壘
壁陣十二月戊戌太白復犯壘壁陣丁未徭賊吳天保
陷辰州是歲詔汰冗官均俸祿賜致仕官及高年帛漕
運使賈魯達言便益二十餘事從其一曰京畿
和糴二曰優卹漕司舊領漕戶三曰接運委官四曰通
州總治豫定委官五曰船戶困於垣夫海糧壞於垣戶
六曰疏濬運河七曰臨清運糧萬戶府當隸漕司八曰
旨以宣忠船戶付本司節制冀寧平遙等縣曹七七反
命刑部郎中八十兵馬指揮沙不丁討平之

十年春正月丙辰朔以中書右丞搠思監爲平章政事

壬樞虎兒吐華爲中書右丞壬戌立四川容美洞軍民
總管府壬申太陰犯熒惑甲戌隕石棣州色黑中微有
金星先有聲自西北來至州北二十里乃隕二月丙戌
詔加封天妃父種德積慶侯母育聖顯慶夫人辛丑太
陰犯平道甲辰太陰犯鍵閉三月己卯熒惑犯太微垣
是月奉化州山石裂有禽鳥草木山川人物之形夏四
月己丑左司都事武祺建言更鈔法丁酉赦天下其略
曰朕纂承洪業撫臨萬邦夙夜厲精靡遑暇逸比緣倚
注失當治理乖方是用圖任一相俾贊萬機爰命脫脫
爲中書右丞相統正百官允釐庶績曾未期月百度具

舉中外協望朕甚嘉焉尚慮軍國之重民物之繁政令有未孚生意有未遂可赦天下丙午太白犯鬼宿是月車駕時巡上都六月壬子星大如月入北斗震聲若雷三日復還秋七月辛酉太陰犯房宿癸亥以大護國仁王寺昭應宮財用規運總管府仍屬宣政院辛未太白晝見丁丑太白復晝見八月壬寅車駕還自上都九月癸丑朔太白晝見辛酉祭三皇如祭孔子禮先是歲祀以醫官行事江西廉訪使文殊訥建言禮有未備乃勅工部具祭器江浙行省造雅樂太常定儀式翰林撰樂章至是用之壬戌熒惑犯天江庚午命樞密院以軍士

五百修築白河堤壬午脫脫以吏部選格條目繁多莫適據依銓選者得以高下之請編類爲成書從之冬十月癸巳歲星犯軒轅乙未吏部尚書偁哲篤建言更鈔法命中書省御史臺集賢翰林兩院之臣集議之丙申太陰犯昴宿辛丑置諸路寶泉都提舉司於京城是月大名東平濟南徐州各立兵馬指揮司以捕土馬賊十一月壬子朔日有食之丙辰以高麗瀋王之孫脫脫不花等爲東宮怯薛官辛酉罷遼陽濱海民煎熬野鹽戊辰太陰犯鬼宿己巳詔天下以中統交鈔壹貫文權銅錢一千文準至元寶鈔貳貫仍鑄至正通寶錢並用以

實鈔法至元寶鈔通行如故是月三星隕于耀州化爲石如斧形削之有屑擊之有聲十二月壬午朔修大都城辛卯以大司農禿魯等兼領都水監集河防正官議黃河便益事命前同知樞密院事不顏不花等討廣西徭賊乙未太陰犯鬼宿巳酉方國珍攻溫州是歲京師麗正門樓上忽有人妄言災禍鞠問之自稱薊州人已而不知所往

十一年春正月乙卯享于太廟丙辰辰星犯牛宿庚申命江浙行省左丞孛羅帖木兒討方國珍丁卯蘭陽縣有紅星大如斗自東南墜西北其聲如雷巳卯命搠思

監提調大都留守司二月庚寅太陰犯鬼宿乙未太陰犯太微丁酉太陰犯亢宿是月命遊皇城中書省臣諫止之不聽立湖南元帥府分府于寶慶路三月庚戌立山東分元帥府于登州丙辰親策進士八十三人賜朶烈圖文允中進士及第其餘賜出身有差壬戌徵建寧處士彭炳爲端本堂說書不至丁卯太陰犯東咸戊辰太陰犯天江是月遣使賑湖南北被寇人民死者鈔五錠傷者三錠燬所居屋者一錠夏四月壬午詔開黃河故道命賈魯以工部尚書爲總治阿防使發汴梁大名十三路民十五萬廬州等戍十八翼軍二萬自黃陵岡

南達白茅放于黃固哈只等口又自黃陵西至陽青村
合于故道凡二百八十里有奇仍命中書右丞王樞虎
兒吐華同知樞密院事黑廝以兵鎮之冀寧路屬縣多
地震半月乃止乙酉享于太廟詔加封河瀆神爲靈源
神祐弘濟王仍重建河瀆及西海神廟改永順安撫司
爲宣撫司丁酉孟州地震庚子罷海西遼東道巡防捕
盜所立鎮寧州辛丑師壁安撫司土官田驢什用盤順
府土官墨奴什用降立長官司四巡檢司七乙巳彰德
路雨雹形如斧傷人畜是月罷沂州分元帥府改立兵
馬指揮使司復分司于膠州車駕時巡上都五月巳酉

朔日有食之辛亥穎州妖人劉福通爲亂以紅巾爲號
陷潁州初欒城人韓山童祖父以白蓮命燒香惑衆謫
徙廣平未平縣至山童倡言天下大亂彌勒佛下生河
南及江淮愚民皆翕然信之福通與杜遵道羅文素盛
文郁王顯忠韓咬兒復鼓妖言謂山童實宋徽宗八世
孫當爲中國主福通等殺白馬黑牛誓告天地欲同起
兵爲亂事覺縣官捕之急福通遂反山童就擒其妻楊
氏其子韓林兒逃之武安癸丑文水縣雨雹壬申命同
知樞密院事禿赤以兵討劉福通授以分樞密院印丙
子命大都至汴梁二十四驛凡馬一疋助給鈔五錠六

月發軍一千從直沽至通州疏濬河道是月劉福通據
朱臯攻破羅山真陽確山遂犯武陽葉縣等處江浙左
丞李羅帖木兒爲方國珍所敗秋七月丙辰廣西大水
丁巳罷四川大奴管勾洞長官司改立忠孝軍民府巳
未大陰犯斗宿壬戌太陰犯右執法巳巳太白犯左執
法災感人鬼宿是月開河功成乃議塞決河命大司農
達識帖睦邇及江浙行省叅知政事樊執敬浙東廉訪
使董守慤同招諭方國珍八月丁丑朔中興地震戊寅
祭社稷乙酉大陰犯天江丙戌蕭縣李二及老彭趙君
用攻陷徐州李二號芝蔴李與其黨亦以燒香聚衆而

反是月車駕還自上都蘄州羅田縣人徐貞一名壽輝
與黃州麻城人鄒普勝等以妖術陰謀聚衆遂舉兵爲
亂以紅巾爲號九月戊申以中書平章政事朶兒直班
提調宣文閣知經筵事平章政事定住提調會同館事
壬子命御史大夫也先帖木兒知樞密院事及衛王寬
徹哥總率大軍出征河南妖寇各賜鈔一千錠從征者
賜予有差乙卯辰星犯左執法丁巳太白犯房宿壬戌
詔以高麗國王不荅失里之弟伯顏帖木兒襲其王封
不荅失里之子遂廢戊辰太陰犯鬼宿是月劉福通陷
汝寧府及息州光州衆至十萬徐壽輝陷蘄水縣及黃

州路冬十月戊寅熒惑犯太微垣巳卯享于太廟辛巳
太陰犯斗宿癸未立寶泉提舉司于河南行省及濟南
興寧等路凡九江浙江西湖廣行省等處凡三命知樞
密院事老章以兵同也先帖木兒討河南妖寇乙酉太
白犯斗宿巳丑太白晝見熒惑犯歲星辛卯太白犯斗
宿立中書分省于濟寧癸巳歲星犯右執法癸卯以宗
王神保克復睢寧虹縣有功賜金帶一從征者賞銀有
差丙午熒惑犯左執法是月天雨黑子于饒州大如黍
菽徐壽輝據蘄水爲都國號天完僭稱皇帝改元治平
以鄒普勝爲太師十一月癸酉有星孛于婁宿甲寅孛

星見于胃宿乙卯丙辰亦如之丁巳太陰犯填星孛星
微見于畢宿黃河堤成散軍民役夫庚午監察御史徹
徹帖木兒等言右丞相脫脫治河功成宜有異數以旌
其勞甲戌江西妖人鄧南二作亂攻瑞州總管禹蘇福
擒斬之是月遣使以治河功成告祭河伯召賈魯還朝
超授榮祿大夫集賢大學士賜金繫腰一銀十錠鈔千
錠幣帛各二十四匹都水監并有司官有功者三十七員
皆陞遷其職詔賜脫脫荅刺罕之號俾世襲之以淮安
路爲其食邑命立河平碑十二月丙子朔太白晝見丁
丑太白經天巳卯立河防提舉司隸行都水監庚辰太

白經天是夜犯壘壁陣甲申太陰犯填星丙戌太白復經天是夜復犯壘壁陣以治書侍御史烏古孫良楨爲中書叅知政事辛卯太白經天壬辰復如之丁酉太白晝見太陰犯熒惑命脫脫於淮安立諸路打捕鷹房民匠錢糧總管府秩從三品庚子太白經天辰星犯天江辛丑太白經天也先帖木兒復上蔡縣擒韓咬兒等至京師誅之壬寅太白晝見是歲括馬

十二年春正月丙午朔詔印造中統元寶交鈔一百九十萬錠至元鈔十萬錠戊申竹山縣賊陷襄陽路總管柴肅死之是日荆門州亦陷己酉時享太廟庚戌以

政院使月魯不花爲中書平章政事壬子中書省臣言河南陝西腹裏諸路供給繁重調兵討賊正當春首畊作之時恐農民不能安於田畝守令有失勸課宜委通曉農事官員分道巡視督勒守令親詣鄉都省諭農民依時播種務要人盡其力地盡其利其有曾經盜賊水患供給之處貧民不能自備牛種者所在有司給之仍令總兵官禁止屯駐軍馬毋得踏踐以致農事廢弛從之乙卯淮東宣慰司添設同知宣慰司事及都事各一員丙辰徐壽輝遣僞將丁普郎徐明遠陷漢陽丁巳陷興國府己未徐壽輝遣鄒普勝陷武昌威順王寬徹普

化湖廣行省平章政事和尚棄城走刑部尚書阿魯收
捕山東賊給勅牒十一道使分賞有功者辛酉徐壽輝
偽將魯法興陷安陸府知府丑驢戰不勝死之癸亥刑
部添設尚書侍郎郎中員外郎各一員五愛馬添設忽
刺罕赤一百名乙丑太陰犯熒惑丙寅以河復故道大
赦天下己巳歲星犯右執法辛未徐壽輝兵陷沔陽府
壬申中興路陷山南宣慰司同知月古輪失領兵出戰
衆潰宣慰使錦州不花山南廉訪使卜禮月敦皆遁走
是月命速魯魯爲淮東添設元帥統領兩淮所募鹽丁
五千討徐州拘刷河南陝西遼陽三省及上都大都腹
裏等處漢人馬命四川行省平章政事月魯帖木兒爲
總兵官與四川行省右丞長吉討興元金州等處賊宣
政院同知桑哥率領亦都護畏吾兒軍與荆湖北道宣
慰使朵兒只班同守襄陽濟寧兵馬指揮使寶童統領
右都衛軍從知樞密院事月闊察兒討徐州二月乙亥
朔詔許溪洞蠻徭自新丁丑以集賢大學士賈魯爲中
書添設左丞以河南廉訪使哈藍朵兒只爲荆湖北道
宣慰使都元帥守襄陽癸未命諸王禿堅領從官百人
馳驛守揚州賜金一錠鈔一千鈔命寧王牙安沙鎮四
川賜鎮南王孛羅不花鈔一萬錠甲申鄒平縣馬子昭

爲亂捕斬之乙酉徐壽輝兵陷江州總管李黼死之遂
陷南康路丙戌霍州靈石縣地震徐壽輝兵陷岳州房
州賊陷歸州戊子詔徐州內外羣聚之衆限二十日不
分首從並與赦原置安東安豐分元帥府己丑游皇城
庚寅太陰犯太微垣癸巳太陰犯氐宿辛丑鄧州賊王
權張椿陷澧州龍鎮衛指揮使俺都刺哈蠻等帥師復
之褒贈伏節死義宣徽使帖木兒等二十七人壬寅以
御史大夫納麟爲江南行臺御史大夫仍太尉命翰林
學士承旨八剌與諸王孛魯奚領軍守大名癸卯命中
書平章政事月魯不花知經筵事左丞賈魯參知政事

帖理帖木兒烏古孫良楨並同知經筵事是月賊侵滑
濬命德住爲河南右丞守東明德住時致仕于家聞命
馳至東明浚城隍嚴備禦賊不敢犯徐壽輝僞將歐祥
陷袁州命帖理帖木兒以中書參知政事分省濟寧三
月乙巳朔追封太師忠王馬扎兒台爲德王丁未徐壽
輝僞將許甲攻衡州洞官黃安撫敗之徐壽輝僞將陶
九陷瑞州總管禹蘇福萬戶張岳敗之壬子河南左丞
相太不花克復南陽等處癸丑中書省臣請行納粟補
官之令凡各處士庶果能爲國宣力自備糧米供給軍
儲者照依定擬地方實授常選流官依例陞轉封廕及

已除茶鹽錢穀官有能再備錢糧供給軍儲者驗見授品級改授常流從之戊午太陰犯進賢辛酉命親王阿兒麻以兵討商州等處賊以鞏上班知行樞密院事壬戌太陰犯東咸甲子徐壽輝僞將項普略陷饒州路遂陷徽州信州四川未附生蠻向亞甲洞主墨得什用出降立盤順府丁卯江南行臺御史大夫帖木哥乞致仕不允以爲甘肅行省平章政事以出征馬少出幣帛各一十萬匹於迤北萬戶千戶所易馬戊辰太白晝見詔南人有才學者依世祖舊制中書省樞密院御史臺皆用之中書省臣言張瑄獻言饒州德興三處膽水浸錢

可以成銅宜卽其地各立銅冶場直隸寶泉提舉司宜以張瑄就爲銅冶場官從之以江浙行省左丞相亦憐真班爲江西行省左丞相領兵收捕饒信賊庚午詔隨朝一品職事及省臺院六部翰林集賢司農太常宣政宣徽中政資正國子祕書崇文都水諸正官各舉循良材幹智勇兼全堪充守令者二人知人多者不限員數各處試用守令並授兼管義兵防禦諸軍奧魯勸農事所在上司不許擅差守令旣已優陞其佐貳官員比依入廣例量陞二等任滿驗守令全治者與真授不治者全削二等依本等敘半治者減一等敘雜職人員其有

知勇之士並依上例凡除常選官於殘破郡縣及迫近賊境之處陞四等稍近賊境陞二等是月方國珍復劫其黨下海入黃巖港台州路達魯花赤秦不花率官軍與戰死之隴西地震百餘日城郭頽夷陵谷遷變定西會州靜寧庄浪尤甚會州公宇中墻崩獲弩五百餘張長者丈餘短者九尺人莫能挽改定西爲安定州會州爲會寧州詔定軍民官不守城池之罪閏三月辛巳以台州路達魯花赤秦不花爲江浙行省參知政事行台州路事命下秦不花已死壬午以大理宣慰使荅失八都魯爲四川行省添設參知政事與本省平章政事咬

住討山南湖廣等處賊乙酉徐壽輝僞將陳普文陷安吉路鄉民羅明遠起義兵復之命工部尚書朶來兵部侍郎馬某火者分詣上都察罕腦兒集寧等處給散出征河南達達軍口糧立淮南江北等處行中書省治揚州轄揚州高郵淮安滁州和州廬州安豐安慶蘄州黃州壬辰以大都留守兀忽失爲江浙行省添設右丞討饒信賊丙申阿速愛馬里納忽台擒滑州開州賊韓兀奴罕有功授資用庫大使丁酉湖廣行省參知政事鐵傑以湖南兵復岳州戊戌詔淮南行省設官二十五員以翰林學士承旨晃火兒不花湖廣平章政事失列門

並爲平章政事淮東元帥蠻子爲右丞燕南廉訪使秦
從德爲左丞陝西行臺侍御史荅失禿山北廉訪使趙
璉並爲參知政事庚子以樞密副使悟良哈台爲中書
添設參知政事同知經筵事辛丑命淮南行省平章政
事晃火兒不花提調鎮南王傳事是月詔四川行省平
章政事咬住以兵東討荆襄賊克復忠萬夔雲陽等州
命江西行省左丞相亦憐真班以兵守江東西關隘命
諸王亦憐真班愛因班參知政事也先帖木兒與陝西
行省平章政事月魯帖木兒討南陽襄陽賊刑部尚書
阿魯討海寧賊江西行省右丞火你赤與參知政事朵

解討江西賊以浙東宣慰使恩寧普代江浙行省左丞
左荅納失里守蕪湖命江西行省右丞兀忽失江浙行
省左丞老老與星吉不顏帖木兒蠻子海牙同討饒信
等處賊方國珍不受招安之命命江浙左丞左荅納失
里討之命典瑞院給淮南行省銀字圓牌三面驛券五
十道詔江西行省左丞相亦憐真班淮南行省平章政
事晃火兒不花江浙行省左丞左荅納失里湖廣行省
平章政事也先帖木兒四川行省平章政事八失忽都
及江南行臺御史大夫納麟與江浙行省官並以便宜
行事也先帖木兒駐軍沙河軍中夜驚軍潰退屯采仙

鎮詔以中書平章政事蠻子代總其兵也先帖木兒還京師仍命爲御史大夫夏四月癸卯朔日有食之江西臨川賊鄧忠陷建昌路己酉時享太廟甲寅以御史大夫擲思監爲中書平章政事提調留守司乙卯鐵傑及萬戶陶夢楨復武昌漢陽尋再陷丙辰江西宜黃賊塗佑與邵武建寧賊應必達等攻陷邵武路總管吳按攤不花以兵討之千戶魏淳以計擒塗佑應必達復其城辛酉翰林學士承旨渾都海牙乞致仕不允以爲中書平章政事四川行省參知政事桑哥失里復渠州甲子翰林學士承旨歐陽玄以湖廣行省右丞致仕賜玉帶及鈔一百錠給全俸終其身戊辰諸王禿堅帖木兒平章政事也先帖木兒討和州有功各賜金繫腰并鈔一千錠辛未荆門知州聶炳復荆門州平章政事忽都海牙年老有疾詔免其朝賀是月大駕時巡上都永懷縣賊陷桂陽咬住復歸州進攻峽州與峽州總管趙余禱大破賊兵誅賊將李太素等遂平之詔天下完城郭築隄防命亦都護月魯帖木兒領畏吾兒軍馬同豫王阿剌忒納失里知樞密院事老章討襄陽南陽鄧州賊陝西行臺監察御史蒙古魯海牙范文等糾言也先帖木兒喪師辱國乞明正其罪詔不允左遷西臺御史大夫

朶爾直班爲湖廣行省平章政事蒙古魯海牙十二人
爲各路添設佐貳官五月癸酉朔太白犯鎮星戊寅命
龍虎山張嗣德爲三十九代天師給印章海道萬戶李
世安建言權停夏運從之命江南行臺御史大夫納麟
給宣勅與台州民陳子由楊恕卿趙士正戴甲令其集
民丁夾攻方國珍已卯咬住復中興路庚辰監察御史
徹徹帖木兒等言河南諸處羣盜輒引亡宋故號以爲
口實宜以瀛國公子和尚趙完普及親屬徙沙州安置
禁勿與人交通從之罷苾兒棚等處金銀場課癸未肆
昌民戴良起鄉兵克復建昌路乙酉命留守帖木哥與

諸王朶兒只守口北龍慶州是月荅失八都魯至荊門
增募兵趨襄陽與賊戰大敗克之命左荅納失里仍守
蕪湖險隘六月丙午中書省臣言大名路開滑濟三州
元城十一縣水旱蟲蝗饑民七十一萬六千九百八十
口給鈔十萬錠賑之戊申命治書侍御史杜秉彝中書
參議李稷並兼經筵官辛亥太白犯井宿河南行省左
丞匝納祿參知政事王也速迭兒並以失誤軍需左遷
添設淮西宣慰使隨軍供給命河南行省平章政事禿
魯參知政事李猷供給汝寧軍需丁巳賜中書參知政
事悟良哈台珠衣并帽乙丑宣讓王帖木兒不花諸王

乞塔歹曲憐帖木兒及淮南廉訪使班祝兒並平賊有功賜金繫腰銀鈔有差紹慶宣慰使楊延禮不花遙授湖廣左丞楊伯顏卜花為紹慶宣慰使換文資楊城為沿邊溪洞招討使兼征行萬戶回賜先所拘收牌面丙寅紅巾周伯顏陷道州修太廟西神門秋七月丁丑時享太廟庚辰饒徽賊犯昱嶺關陷杭州路辛巳命通政院使答兒麻失里與樞密副使禿堅不花討徐州賊給勅牒三十道以賞功己丑湘鄉賊陷寶慶路庚寅以殺獲西番首賊功賜岐王阿刺乞巴鈔一千錠邠王嵬厘諸王班的失監平章政事鎖南班各金繫腰一以征西

元帥幹羅為章珮添設少監討徐州脫脫請親出師討徐州詔許之辛卯命脫脫言為行樞密院使提調二十萬戶賜金繫腰一銀鈔幣帛有差丁酉辰星犯靈臺以杜秉彝為中書添設叅知政事湖南元帥副使小云失海牙總管兀顏思忠復寶慶路是月徐壽輝偽將王善康壽四江二蠻等陷福安寧德等縣八月癸卯命中書叅知政事帖里帖木尔淮南行省右丞蠻子供給脫脫行軍一應所需方國珍率其眾攻台州城浙東元帥也忒迷失福建元帥黑的兒擊退之甲辰以同知樞密院事哈麻為中書添設右丞齊王失列門獻馬一萬五千

匹于京師賜脫脫金三錠銀三十錠鈔一萬錠幣帛各一千疋丁未日本國白高麗賊過海剽掠身稱島居民高麗國王伯顏帖木兒調兵勦捕之賜金繫腰一鈔二千錠已酉命知樞密院事咬咬中書平章政事搠思監也可扎魯忽赤福壽並從脫脫出師征徐州賜金繫腰及銀鈔幣帛有差翰林學士承旨闊怯鎮遏五投下百姓賜金繫腰一壬子以扎撒溫孫爲河南行省右丞僕哲篤爲淮南行省左丞各賜鈔五十錠丙辰以禿思迷失爲淮南行省平章政事丁巳命中書平章政事普化知經筵事脫脫將出師六部尚書密邇麻和謨等上言

大臣天子之股肱中書庶政之根本不可以一日離乞詔留賢相弼亮天工如此則內外有兼治之宜社稷有倚重之寄不報脫脫言皇后韓耳朶思支用不敷自今爲始每年宜給金一十錠銀五十錠以同知樞密院事雪雪出軍南陽同知樞密院事禿赤出軍河南皆有功各進階榮祿大夫中書左丞哈麻進階榮祿大夫庚申命哈麻等提調各怯薛各愛馬口糧丁卯太白犯歲星詔脫脫以答剌罕太傅中書右丞相分省于外督制諸處軍馬討徐州中書省樞密院御史臺分官屬從行稟受節制爵賞有功誅殺有罪緩順討逆悉聽便宜從事

是日發京師是月大駕還大都安陸賊將俞君正復陷
荆門州知州聶炳死之賊將党仲達復陷岳州九月乙
亥俞君正復陷中興咬住領兵與戰於樓臺敗績奔松
滋本路判官上都死之己卯監察御史及河南分御史
臺行樞密院河南廉訪司鞏昌總帥府陝西都府義兵
萬戶府等官交章言御史大夫也先帖木兒出征河南
功績庚辰賜也先帖木兒金繫腰一金一錠銀一十錠
鈔五千錠幣帛各一百匹癸未中興義士范中偕荆門
僧李智率義兵復中興路俞君正敗走龍鎮衛指揮使
俺都刺哈蠻領兵入城咬住自松滋還屯兵于石馬乙

酉脫脫至徐州丁亥命知行樞密院事阿刺吉從脫脫
討徐州賜金繫腰一金一錠銀五錠鈔幣有差辛卯脫
脫復徐州屠其城芝蔴李等遁走壬辰太陰犯軒轅戊
戌賜哈麻鈔三百錠買玉帶己亥賊攻辰州達魯花赤
和尚擊走之庚子詔加脫脫為太師班師還京冬十月
丁未時享太廟庚戌知樞密院事老童進階金紫光祿
大夫命平章定住右丞哈麻同知經筵事癸丑命和糴
粟豆五十萬石于遼陽甲寅拜知行樞密院事阿乞刺
為太尉淮南行省平章政事戊午太陰犯鬼宿甲子太
陰犯歲星乙丑太陰犯亢宿十一月辛未命江浙行省

平章政事慶童收捕常州賊乙亥以星吉爲江西行省
平章政事出師湖廣丙子中書省臣請爲脫脫立徐州
平寇碑及加封王爵癸未命江浙行省右丞帖里帖木
兒總兵討方國珍己丑以脫脫平徐功賜金一十錠銀
一百錠鈔五萬錠幣帛各三千匹上表辭從之庚寅太
陰犯太微垣十二月壬寅荅失八都魯復襄陽辛亥詔
以杭常湖信廣德諸路皆克復赦詿誤者蠲其夏稅秋
糧命有司撫恤其民辛酉以湖廣行省叅知政事卜顏
不花右丞阿兒灰討獫狁賊復湖南潭岳等處有功卜顏
不花陞散階從一品阿兒灰陞正二品癸未脫脫言京

畿近地水利召募江南人耕種上歲可得粟麥百萬餘石
不煩海運而京師足食帝曰此事有利於國家其議行
之是歲海運不通立都水庸田使司于汴梁掌種植之
事潁州沈丘人察罕帖木兒與信陽州羅山人李思齊
同起義兵破賊有功授察罕帖木兒中順大夫汝寧府
達魯花赤李思齊知汝寧府

元史卷四十二終

元史卷四十三

本紀第四十三

皇明翰學士薛大矣知制誥兼脩國史臣宋濂

翰侍制直學士知制誥兼國史院編脩官臣王禕等奉勅脩

順帝六

十三年春正月庚午朔用帝師請釋放在京罪囚以中書添設平章政事哈麻為平章政事參知政事悟良哈台為右丞參知政事烏古孫良楨為左丞詔印造中統元寶交鈔一百九十萬錠至元鈔一十萬錠辛未命悟

康熙二十五年重修

元史卷四十三

本紀

一

長哈台烏古孫良楨兼大司農卿給分司農司印西自
西山南至保定河間北至檀順州東至遷民鎮凡係官
地及元管各處屯田悉從分司農司立法佃種合用工
價牛具農器穀種召募農夫諸費給鈔五百萬錠以供
其用旌表真定路藁城縣董氏婦貞節壬申命陝西行
省平章政事卜答失里爲總兵官癸酉享于太廟以皇
第二子育于太尉衆家奴家賜衆家奴及乳母鈔各一
千錠甲戌重建穆清閣乙亥命中書右丞禿禿以兵討
商州賊丙子方國珍復降以司農司舊署賜哈麻庚辰
中書省臣言近立分司農司宜於江浙淮東等處召募
能種水田及脩築圍堰之人各一千名爲農師教民播
種宜降空名添設職事勅牒一十二道遣使齎往其地
有能募農夫一百名者授正九品二百名者正八品三
百名者從七品卽書填流官職名給之就令管領所募
農夫不出四月十五日俱至田所期年爲滿卽放還家
其所募農夫每名給鈔十錠從之以杜乘彝爲中書參
知政事乙酉太陰犯太微垣丙戌以武衛所管鹽臺屯
田八百頃除軍見種外荒閑之地盡付分司農司答失
八都魯克復襄陽樊城有功陞四川行省右丞賜金繫
腰一庚寅知樞密院事老章克復南陽唐州賜金一錠

銀一十錠鈔一千錠幣帛各五十匹戊戌熒惑太白辰
星聚于奎宿二月丁未祭先農巳酉太陰犯軒轅庚戌
太白犯熒惑壬子太陰犯太微垣甲寅中書省臣言徐
州民願建廟宇生祠右丞相脫脫從之詔仍立脫脫平
徐勲德碑壬戌以宣政院使篤憐帖木兒知經筵事中
書右丞悟良哈台左丞烏古孫良楨叅知政事杜秉彝
並同知經筵事三月巳卯命脫脫領大司農司甲申詔
脩大承天護聖寺賜鈔二萬錠丁亥命脫脫以太師開
府提調太史院回回漢兒司天監巳丑以各衙門係官
田地并宗仁等衛屯田地土並付司農分司播種是月
會州定西靜寧莊浪等州地震命江浙行省左丞帖里
帖木兒江南行臺侍御史左答納失里招諭方國珍夏
四月戊戌朔命南北兵馬司各分官一員就領通州瀟
州直沽等處巡捕官兵往來巡邏給分司印一同署事
半載一更特命烏古孫良楨得用軍器庚子以禮部所
轄掌薪司并地土給付司農分司以甘肅行省平章政
事鎖南班爲永昌宣慰使總永昌軍馬仍給平章政事
俸先是永昌愚魯罷等爲亂鎖南班討平之至是復起
故有是命辛丑太白犯井宿乙巳時享太廟巳酉詔取
勘徐州汝寧南陽鄧州等處荒田并戶絕籍沒入官者

立司牧署掌司農分司耕牛又立王田屯署降徐州路
爲武安州以所轄縣屬歸德府其滕州嶧州仍屬益都
路辛亥太陰犯房宿是月車駕時巡上都五月己巳命
東安州武清大興宛平三縣正官添給河防職名從都
水監官巡視渾河隄岸或有損壞卽脩理之辛未江西
行省左丞相亦憐真班江浙行省左丞老老引兵取道
自信州元帥韓邦彥哈迷取道由徽州浮梁同復饒州
浙黃等賊聞風皆奔潰癸酉以太尉阿剌吉爲嶺北行
省左丞相知行樞密院事伯家奴封武國公與諸王孛
羅帖木兒同出軍甲戌行樞密院添設僉院二員乙亥

太陰犯歲星乙未秦州白駒塲亭民張士誠及其弟士
德士信爲亂陷秦州及興化縣遂陷高郵據之僭國號
大周自稱誠王建元天祐六月丙申朔立詹事院設詹
事三員同知二員副詹事二員丞二員命四川行省平
章政事王樞虎兒吐華便宜行事丁酉立皇子愛猷識
理達臘爲皇太子中書令樞密使授以金寶告祭天地
宗廟命右丞相脫脫兼詹事己亥詔征西都元都汪只
南發本處精銳勇敢軍一千人從征討以千戶二員百
戶一十員領之庚子知樞密院事失剌把都總河南軍
平章政事答失八都魯總四川軍自襄陽分道而下克

復安陸府辛丑罷宮傳府以所掌錢帛歸詹事院癸卯
詔以勅牒二十道鈔五萬錠給付淮南行省平章政事
達世帖睦爾於淮南淮北等處召募壯丁并總領漢軍
蒙古守禦淮安遼東撈羊哈及乾帖因木赤木等五十
六名吾者野人以皮貨來降給撈羊哈等三人銀牌一
面管領吾者野人甲辰以立皇太子詔天下大赦己酉
亦都護高昌王月魯帖木兒薨于南陽軍中命其子桑
哥襲亦都護高昌王爵辛亥親王完者禿泰州陣亡八
禿亳州陣亡各賻鈔五百錠命前河西廉訪副使也先
不花爲淮西添設宣慰副使討泰州丙辰詔皇太子位
下立儀衛司設指揮二員給二珠金牌副指揮二員一
珠金牌賜吳王搠思監金二錠銀五錠鈔二千錠幣帛
各九匹以資政院所轄左右都威衛屬詹事院是月命
淮南行省平章政事達世帖睦爾便宜行事詔淮南行
省平章政事福壽討興化是夏薊州大水秋七月丁卯
泉州天雨白絲海潮日三至時享太廟戊辰太白晝見
宦官至一品二品者依常例給俸祿壬申湖廣行省參
知政事阿魯輝復武昌及漢陽府癸酉詔詹事院自行
銓注本院屬官壬辰親王只兒哈忽薨於海寧軍中以
其子寶童繼襲王爵八月癸卯親王闊兒吉思帖木兒

獻馬辛亥賜脫脫東泥河田一十二頃親王只見哈郎
討捕金山賊薨於軍中命其子秃魯帖木兒入備宿衛
庚申命不花帖木兒襲封文濟王是月車駕還自上都
資政院使脫火赤以兵復江州路以四川行省平章政
事玉樞虎兒吐華右丞完者不花守鎮中興路左遷平
章政事咬住爲淮西元帥供給烏撒軍進討蘄黃九月
乙丑朔日有食之乙亥以怯薛官廣平王咬咬征討慢
功削其王爵降爲河南行省平章政事己丑廣寧王渾
都帖木兒薨賻鈔一千錠建皇太子鹿頂殿于聖安殿
西歪刺歹桑哥失里獻馬一百匹賜金繫腰一幣帛各
九庚寅太陰犯熒惑辛卯扎你別之地獻大撒哈刺察
赤兒米西兒刀弓鎖子甲及青白西馬各二匹賜鈔二
萬錠壬辰太白經天熒惑犯左執法南臺御史大夫納
麟以老疾辭職從之命太尉如故丁酉享于太廟庚子
太白經天冬十月癸卯以江浙行省叅知故事買住丁
陞本省右丞提調明年海運甲辰歲星犯氐宿丁未廣
西元帥甄崇福復道州誅賊將周伯顏庚戌從帖里帖
木兒左答納失里之請授方國珍徽州路治中國璋廣
德路治中國瑛信州路治中督遣之任國珍疑懼不受
命立水軍都萬戶府於崑山州以浙東宣慰使納麟哈

刺爲正萬戶宣慰使董搏霄爲副萬戶庚申賜皇太子
妃鈔十萬錠壬戌賜皇太子五愛馬怯薛丹二百五十
人鈔各一百一十錠癸亥太白犯亢宿是月撒世祖所
立毘殿改建殿宇十一月壬申太陰犯壘壁陣乙酉立
典藏庫貯皇太子錢帛丁亥江西右丞火你赤以兵平
富州臨江遂引兵復瑞州是月立義兵千戶水軍千戶
所于江西事平願還爲民者聽十二月丁酉太白犯東
咸巳亥寧王旭滅該還大幹耳朶思賜金繫腰一鈔一
千錠庚子熒惑入氐宿癸卯脫脫請以趙完普家產田
地賜知樞密院事桑哥失里庚戌京城天無雲而雷鳴
少頃有火見于東南淮慶路及河南府西北有聲如擊
鼓者數四巳而雷聲震地癸丑以西安王阿剌忒納失
里爲豫王弟答兒麻討南陽賊有功以西安王印與之
命鎮寵吉兒之地丁巳太陰犯心宿西寧王牙罕沙鎮
四川還沙州賜鈔一千錠是月大同路疫死者大半江
浙行省平章政事卜顏帖木兒南臺御史中丞蠻子海
牙及四川行省叅知政事哈臨禿左丞桑禿失里西寧
王牙罕沙合軍討徐壽輝于蘄水敗之壽輝遁走獲其
僞官四百餘人陝西行省平章政事孛羅四川行省右
丞答失八都魯復均房等州詔孛羅等守之答失八都

魯討東正陽是歲自六月不雨至于八月造清寧殿前
山子月宮諸殿宇以宦官留守也先帖木兒留守同知
也速迭兒及都水少監陳阿木哥等董其役哈麻及禿
魯帖木兒等陰進西天僧于帝行房中運氣之術號演
揲兒法又進西番僧善祕密法帝皆習之

十四年春正月甲子朔汴梁城東汴河冰皆成五色花
草如繪畫三日方解乙丑熒惑犯歲星丁卯太白犯建
星辛未享于太廟壬申命帖木兒不花襲封廣寧王賜
鈔一千錠癸酉熒惑犯房宿立遼陽等處漕運庸田使
司屬分司農司丁丑帝謂脫脫曰朕嘗作朶思哥兒好

事迺自傘蓋遊皇城實爲天下生靈之故今命刺麻選
僧一百八人仍作朶思哥兒好事凡所用物官自給之
毋擾于民丙戌以答兒麻監藏遙授陝西行省平章政
事實授行宣政院使整治西番人民是月命桑哥失里
哈臨禿守中興答失八都魯復峽州二月戊戌祭社稷
乙卯命中書平章政事搠思監提調規運總管府戊午
太白犯壘壁障己未以湖廣行省平章政事苟兒爲淮
南行省平章政事以兵攻高郵是月以呂思誠爲湖廣
行省左丞命湖廣行省右丞伯顏普化江南行臺中丞
蠻子海牙江浙行省平章政事十顏帖木兒叅知政事

阿里溫沙會合湖廣行省平章政事也先帖木兒討沿
江賊立鎮江水軍萬戶府命江浙行省右丞佛家闇領
之詔河南淮南兩省並立義兵萬戶府建清河大壽元
忠國寺以江浙廢寺田歸之三月癸亥朔日有食之已
巳廷試進士六十二人賜薛朝晤牛繼志進士及第餘
授官出身有差壬申以皇太子行幸和買駝馬甲戌命
親王速哥帖木兒以兵討宿州賊丙子潁州陷是月中
書定擬義兵立功者權任軍職事平授以民職從之命
四川行省右丞答失八都魯陞本省平章政事兼知行
樞密院事總荆襄諸軍從宜調遣詔和買馬于北邊以
供軍用凡有馬之家十匹內和買二匹每匹給鈔一十
錠夏四月癸巳朔汾州介休縣地震泉湧以武祺叅議
中書省事是月車駕時巡上都江西湖廣大饑民疫癘
者甚衆御史臺臣糾言江浙行省左丞帖里帖木兒等
罪先是帖里帖木兒與江南行臺侍御史左答納失里
奉旨招諭方國珍報國珍已降乞立巡防千戶所朝廷
授以五品流官令納其船散遣徒衆國珍不從擁船一
千三百餘艘仍據海道阻絕糧運以故歸罪二人以江
浙行省叅知政事阿兒溫沙陞本省右丞浙東宣慰使
恩寧普爲江浙行省叅知政事皆總兵討方國珍發陝

西軍討河南賊給鈔今自備鞍馬軍器合二萬五千人
馬七千五百匹永昌鞏昌沿邊人匠雜戶亦在遣中造
過街塔於盧溝橋命有司給物色人匠以御史大夫也
先不花督之復立應昌全寧二路先是有詔罷之以撥
屬魯王馬某沙王傅府至是有司以爲不便復之詔復
起永昌鞏昌喃巴臨洮等處軍命各衛軍人脩白浮瓮
山等處隄堰五月甲子安豐正陽賊圍廬州是月詔脩
砌北巡所經色澤嶺黑石頭河西沿山道路勅建龍門
等處石橋皇太子徙居宸德殿命有司脩葺之立南陽
鄧州等處毛胡蘆義兵萬戶府募土人爲軍免其差役
令討賊自効因其鄉人自相團結號毛胡蘆故以名之
詔以王樞虎兒吐華募兵萬人下蜀江代答失八都魯
守中興荆門命答失八都魯以兵赴汝寧陞湖廣行省
叅知政事阿兒灰爲右丞討廬州募寧夏善射者及各
處回回木忽殷富者赴京師從軍復發秃卜軍萬人命
太傅阿剌吉領之命荆王答兒麻失里代闊瑞阿合鎮
河西討西番賊六月辛卯朔薊州雨雹高郵張士誠寇
揚州丙申達識帖睦迺以兵討張士誠敗績諸軍皆潰詔
江浙行省叅知政事佛家間會達識帖睦迺復進兵討
之甲辰太陰入斗宿己酉盱眙縣陷庚戌陷泗州官軍

元史卷四十三 本紀 十三
潰秋七月甲子潞州襄垣縣大風拔木偃禾乙丑太陰
犯角宿壬申詔免大都上都興和三路今年稅糧命刑
部尚書阿魯於汝寧州等處募兵討泗州壬午太陰犯
昴宿是月汾州孝義縣地震八月冀寧路榆次縣桃李
花車駕還自上都九月己未朔賜親王撒蠻答失金二
錠銀二十錠鈔一萬錠幣帛表裏各三百匹創設奧刺
赤二十名仍給衣糧草料庚申以湖廣行省左丞呂思
誠復爲中書左丞辛酉以知樞密院事月赤察兒爲中
書平章政事詔脫脫以太師中書右丞相總制諸王各
愛馬諸省各翼軍馬董督總兵領兵大小官將出征高
郵甲子封高麗國王脫脫不花爲藩王丁卯普顏忽都
皇后母歿賻鈔三百錠立寧宗影堂戊子免河南蒙古
軍人雜泛差役是月賜穆清閣工匠皮衣各一領蓋海
青鷹房禁河南淮南泗階州西番賊起遣兵擊之方國
珍拘執元帥也忒迷失黃巖州達魯花赤宋伯顏不花
知州趙宜浩以俟詔命冬十月甲午享于太廟戊戌詔
答失八都魯及泰不花等會軍討安豐甲辰詔加號海
神爲輔國護聖庇民廣濟福惠明著天妃壬子太陰犯
太微垣十一月丙寅勅中書省樞密院御史臺凡奏事
先啓皇太子詔江浙應有諸王公王后妃寺觀官員撥

賜田糧及江淮財賦稻田營田各提舉司糧盡數赴倉
聽候海運以備軍儲價錢依本處十月時估給之丁卯
脫脫領大兵至高郵辛未戰于高郵城外大敗賊衆丙
子太陰犯鬼宿癸未賜親王喃答失金鑲銀印乙酉脫
脫遣兵平六合縣是月答失八都魯復苗軍所據鄭均
許三州皇太子脩佛事釋京師死罪以下囚十二月辛
卯絳州北方有紅氣如火蔽天丙申以中書平章政事
定住爲左丞相宣政院使哈麻永昌宣慰鎖南班並爲
中書平章政事進階光祿大夫監祭御史袁賽因不花
等劾奏脫脫出師三月略無寸功傾國家之財以爲已
用半朝廷之官以爲自隨又其弟也先帖木兒庸材鄙
器玷汙清臺綱紀之政不修貪淫之心益著章三上詔
令也先帖木兒出都門聽旨以宣徽使汪家奴爲御史
大夫丁酉詔以脫脫老師費財已逾三月坐視寇盜恬
不爲意削脫脫官爵安置淮安路弟御史大夫也先帖
木兒安置寧夏路以河南行省平章政事泰不花爲本
省左丞相中書平章政事月闡察兒加太尉集賢大學
士雪雪知樞密院事一同總兵總領諸處征進軍馬并
在軍諸王駙馬省院臺官及大小出軍官員其滅里卜
亦失你山哈八兒秃哈怯來等拔都兒云都赤秃兒怯

里兀孛可西番軍人各愛馬及朶憐赤高麗回回民義丁壯等軍人並聽總兵官節制詔被災殘破之處令有司賑恤仍蠲租稅三年賜高年帛罷庸田茶運寶泉等司戊戌以定住領經筵事中院使桑哥夫里爲中書添設右丞己亥太陰掩昴宿庚子以桑哥夫里同知經筵事冀國公禿魯加太尉進階金紫光祿大夫癸卯命哈麻提調經正監都水監會同館知經筵事就帶元降虎符甲辰以桑哥夫里提調宣文閣哈麻兼大司農呂思誠兼司農卿提調農務己酉紹興路地震是月命織造世祖御容詔威順王實徹普化還鎮湖廣先是以賊據湖廣命奪其王印至是寬徹普化討賊累立功故詔還其印仍守舊鎮命甘肅右丞嵬的討捕西番賊答失八都魯復河陰鞏縣徭賊自耒陽寇衡州萬戶許脫因死之是歲詔諭民間私租太重以十分爲率普減二分永爲定例降鈔十萬錠賞江西守城官吏軍民京師大饑加以疫癘民有父子相食者帝於內苑造龍船委內官供奉少監塔思不花監工帝自製其樣船首尾長一百二十尺廣二十尺前瓦簾棚穿廊兩暖閣後吾殿樓子龍身并殿宇用五彩金粧前有两爪上用水手二十四人身衣紫衫金荔枝帶四帶頭巾于船兩旁下各執篙

一自後宮至前宮山下海子內往來游戲行時其龍首
眼口爪尾皆動又自製宮漏約高六七尺廣半之造木
爲匱陰藏諸壺其中運水上下匱上設西方三聖殿匱
腰立王女捧時刻籌時至輒浮水而上左右列二金甲
神一懸鐘一懸鈺夜則神人自能按更而擊無分毫差
當鐘鈺之鳴獅鳳在側者皆翔舞匱之西東有日月宮
飛僊六人立宮前遇子午時飛僊自能耦進度僊橋達
三聖殿已而復退立如前其精巧絕出人謂前代所鮮
有時帝息于政事荒於游宴以宮女三聖奴妙樂奴文
殊奴等一十六人按舞名爲十六天魔首垂髮數辨戴
象牙佛冠身被纓絡大紅縞金長短裙金雜襖雲肩合
袖天衣綬帶鞋襪各執加巴刺般之器內一人執鈴杵
奏樂又宮女一十一人練槌髻勒帕常服或用唐帽窄
衫所奏樂用龍笛頭管小鼓箏箏琵琶笙胡琴響板拍
板以宦者長安迭不花管領遇宮中讚佛則按舞奏樂
官官受祕密戒者得入餘不得預

三終

元史卷四十四

本紀第四十四

皇明翰林學士宋大知制誥兼脩國史臣宋 廉

翰林待制承直學士知制誥兼國史院編修官臣王 禮等奉勅脩

順帝七

十五年春正月戊午朔以中書平章政事搠思監提調
留守司宣徽使黑廝爲中書平章政事河南行省左丞
許有壬爲集賢大學士遼陽行省左丞奇伯顏不花陞
本省平章政事壬戌以宣政院副使忻都爲太子詹事

癸亥享于太廟甲子親王禿堅帖木兒歿于軍中賜鈔
五百錠江西行省平章政事道童加大司徒戊辰太陰
犯五車辛未太陰犯鬼宿大幹耳朶儒學教授鄭恒建
言蒙古乃國家本族宜教之以禮而猶循本俗不行三
年之喪又收繼庶母叔嬪兄嫂恐貽笑後世必宜改革
繩以禮法不報丙子上都饑賑糶米二萬石丁丑徐壽
輝僞將倪文俊復陷沔陽府威順王寬徹普化命王子
報恩奴等同湖南元帥阿思藍水陸並進討之至漢川
水淺文俊用火筏燒船報恩奴遇害庚辰復設仁虞雲
需尚供三總管府丙戌大同路饑出糧一萬石減價糶

之是月詔以湖廣行省平章政事乞刺班慢功削其官
爵命從軍自劾詔安置脫脫干亦集乃路收所賜田土
命河南行省參知政事洪丑驢守禦河南陝西行省參
知政事述律朶兒只守禦潼關宗王扎牙失里守禦興
元陝西行省參知政事阿魯溫沙守禦商州通政院使
朶來守禦山東詔豫王阿剌忒納失里與陝西行省平
章政事糊思監從宜商議軍事閏月壬寅以各衛軍人
屯田京畿人給鈔五錠以是日入役日支鈔二兩五錢
仍給牛種農器命司農司令本管萬戶督其勤惰丙午
太陰犯心宿丙辰太白經天是月上都路饑詔嚴酒禁

命河南行省參知政事塔失帖木兒領元管陝西軍馬
守禦河南二月己未劉福通等自碭山夾河迺韓林兒
至立爲皇帝又號小明王建都亳州國號宋改元龍鳳
以其母楊氏爲皇太后杜遵道盛文郁爲丞相羅文素
劉福通爲平章劉六知樞密院事拆鹿邑縣大清真材
建宮闕遵道等各遣子入侍遵道得寵專權劉福通疾
之命甲士槓殺遵道福通遂爲丞相後稱太保丙寅以
中書平章政事黑廝左丞許有二並知經筵事戊辰命
太傅御史大夫汪家奴爲中書右丞相中書平章政事
定住爲左丞相詔天下庚午以河南行省平章政事咬
咬爲遼陽行省左丞相壬申立淮東等處宣慰使司都
元帥府于天長縣統濠泗義兵萬戶府并洪澤等處義
兵聽富民願出丁壯義兵五千名者爲萬戶五百名者
爲千戶一百名者爲百戶仍降宣勅牌面丙子以達識
帖睦爾爲中書平章政事提調雷守司平章政事黑廝
兼大司農是月命刑部尚書董銓等與江西行省平章
政事火你赤專任征討之務便宜從事遣使先降曲赦
諭以禍福如能出降釋其本罪執迷不悛剋日進討三
月庚寅太陰犯五車癸巳徐壽輝兵陷襄陽路甲午命
汪家奴攝太尉持節授皇太子愛猷識理達臘玉冊錫

以冕服九旒祇謁太廟丙申太陰犯房宿辛丑以監察御史言安置脫脫于雲南鎮西路也先帖木兒于四川礪門脫脫長男哈刺章安置肅州次男三寶奴安置蘭州仍籍其家產己酉命知樞密院事衆家奴知經筵事知樞密院事捏兀失該提調內史府癸丑太白經天夏四月壬戌中書省臣言江南因盜賊阻隔所在闕官宜遣人與各省及行臺官以廣東廣西海北海南三品以下通行遷調五品以下先行照會之任江浙行省二年一次遷調福建等處闕官亦依前例從之命彰德等處分樞密院添設同知副使都事各一員癸亥以中書平

章政事達識帖睦邇知經筵事命樞密院添設僉院一員判官二員直沽分樞密院添設副使一員都事一員以御史中丞札撒兀孫同知經筵事乙丑以中書右丞臧卜左丞烏古孫良楨分省彰德辛未命御史中丞伯家奴同知經筵事中書參議成遵兼經筵官癸酉以左丞相定住爲右丞相平章政事哈麻爲左丞相太子詹事桑哥失里爲中書平章政事雪雪爲御史大夫丁丑加知樞密院事衆家奴太傅辛巳親王脫脫薨賜鈔二百錠是月車駕時巡上都詔翰林待制烏馬兒集賢待制孫撫招安高郵張士誠仍齎宣命印信牌面與鎮南

王亨羅不花及淮南行省廉訪司等官商議給付之御史臺劾奏中書左丞呂思誠罷之詔四川等處立宣化鎮南軍民府改立盤順軍民安撫司罷四川羊毋甲洞真南王洞長官司改立忠義軍民安撫司立汴梁等處義兵萬戶府五月壬辰復襄陽路監察御史也里忽都等劾奏河南行省左丞相太不花慢功虐民詔削其官職仍令率領火赤溫從總兵官平章政事答失八都魯在進答失八都魯管領太不花一應軍馬庚戌倪文俊自沔陽陷中興路元帥朵兒只斑死之是月命淮南行省

平章政事咬住淮東廉訪使王也先迭兒撫諭高郵六月丙辰命御史大夫雪雪提調端本堂癸亥太白經天丁卯監察御史哈林禿劾奏脫脫之師集賢大學士吳直方及其叅軍黑漢長史火里赤等並宜追奪從之監察御史歪哥等辯明中書左丞呂思誠給付元追所授宣命玉帶戊辰命中書平章政事搠思監兼大司農桑哥失里知經筵事己巳靖安王闊不花薨無後命其姪襲封靖安王癸酉以四川行省平章政事答失八都魯爲河南行省平章政事乙亥命將作院判官烏馬兒招安濠泗等處章佩監丞普顏帖木兒招安沔陽等處諸

王倒吾沒於軍中賻鈔二百錠丁丑保德州地震己卯
陝西行省平章政事禿禿加答刺罕庚辰徵徽州隱士
鄭玉爲翰林待制不至江浙省臣言至正十五年稅課
等鈔內除詔書已免稅糧等鈔較之年例海運糧并所
支鈔不敷乞減海運以甦民力戶部定擬本年稅糧除
免之外其寺觀并撥賜田糧十月開倉盡行拘收其不
敷糧撥至元折中統鈔一百五十萬錠於產米處糴一
百五十萬石貯瀕河之倉以聽撥運從之癸未中書叅
知政事實理門言舊立蒙古國子監專教四怯薛并各
愛馬官員子弟今宜諭之依先例入學俾嚴爲訓誨從

之是月

大明皇帝起兵自和州渡江取太平路自紅巾妖寇昌
亂之後南北郡縣多陷沒故

大明從而取之荊州大水命湖廣行省平章政事阿魯
灰領軍與淮南行省平章政事蠻子海牙淮西道宣慰
使完者不花以兵攻和州等處命郡王只兒噉伯湖廣
行省右丞卜蘭奚攻討河南以湖廣行省平章政事咬
住爲總兵官領本省軍馬并江州楊完者黃州李勝等
軍守禦湖廣江浙行省參知政事納麟哈刺統領水軍
萬戶等軍會本省平章政事定定進攻常州鎮江等處

命將作院判官烏馬兒利用監丞八十奴招諭濠泗淮南行省左丞相太平助之章佩監丞普顏帖木兒翰林脩撰烈瞻招諭沔陽四川行省平章政事王樞虎兒吐華等助之以怯薛丹潑皮等六十名從江南行御史臺大夫福壽守禦集慶路國王朶兒只薨于揚州軍中命郡王只兒噉伯管領其所部軍馬秋七月辛卯享于太廟壬寅倪文俊復陷武昌漢陽等處是月命親王失里門以兵守曹州山東宣慰馬某火者以兵分府沂州莒州等處命知樞密院事答兒麻監藏及四川行省左丞沙剌班湖南同知宣慰使劉答兒麻失里以兵屯中興

招諭諸處有不降者與親王禿魯及王樞虎兒吐華討之命湖廣行省平章政事桑哥亦禿渾及禿禿守禦襄陽參知政事哈林禿及王塔失帖木爾守禦沔陽如賊徒不降即進兵討之陞台州海道巡防千戶所爲海道防禦運糧萬戶府八月庚申命南陽等處義兵萬戶府召募毛胡蘆義兵萬人進攻南陽戊辰以中書平章政事達識帖睦爾爲江浙行省左丞相便宜行事賜鈔一千錠甲戌以大宗正府扎魯忽赤迭里迷失爲甘肅行省平章政事戊寅太白經天雲南死可伐等降令其子莽三以方物來貢乃立平緬宣撫司四川向思勝降以

安定州改立安定軍民安撫司是月車駕還自上都詔淮南行省左丞相太平統淮南諸軍討所陷郡邑仍命湖廣行省平章政事阿魯灰以所部苗軍聽其節制立吾者野人乞列迷等處諸軍萬戶府于哈兒分之地命親王寬徹班守興元永昌宣慰使完者帖木兒討西番賊以淮南行省平章政事蠻子海牙與同知樞密院事絆住馬等自蕪湖至鎮江南岸守禦同阿魯灰所部軍馬協力衛護江南行臺命答失八都魯從便調度湖廣行省左丞卜蘭奚所領苗軍江浙行省平章政事卜顏帖木兒守禦蘄黃蘭溪等處九月癸未命搠思監提調

武衛以知嶺北行樞密院事紐的該爲中書平章政事乙酉立分海道防禦運糧萬戶府于平江路己丑太白犯太微垣辛卯命祕書卿答蘭提調別吉太后影堂祭祀知樞密院事野儒帖木兒提調世祖影堂祭祀宣政院使蠻子提調裕宗英宗影堂祭祀己亥倪文俊圍岳州路壬子命桑哥失里提調宣文閣呂思誠知經筵事集賢大學士許有壬兼太子諭德是月移置脫于阿輕乞之地命答失八都魯移軍住陳留冬十月丁巳立淮南行樞密院于揚州己未太陰犯壘壁陣甲子命兵工二部尚書撒八兒王安童以金銀牌一百六十五面

給淮東宣慰使司等處義兵官員命哈麻領大司農司
帝謂右丞相定住等曰敬天地尊祖宗重事也近年以
來闕于舉行當選吉日朕將親祀郊廟務盡誠敬不必
繁文卿等其議典禮從其簡者行之遂命右丞幹樂左
丞呂思誠領其事以中書右丞拜住爲平章政事庚午
以襲封衍聖公孔克堅同知太常禮儀院事以克堅子
希學爲襲封衍聖公癸酉太陰犯軒轅哈麻奏言郊祀
之禮以太祖配皇帝出宮至郊祀所便服乘馬不設內
外儀仗教坊隊子齋戒七日內散齋四日於別殿致齋
三日二日於大明殿西幄殿一日在南郊祀所丙子以

郊祀命皇太子愛猷識理達臘祭告太廟己卯以翰林
學士承旨慶童爲淮南行省平章政事立黃河水軍萬
戶府于小清口十一月甲申災惑犯氏宿庚寅填星犯
井宿壬辰親祀上帝于南郊以皇太子愛猷識理達臘
爲亞獻攝太尉右丞相定住爲終獻甲午以太不花爲
湖廣行省左丞相總兵招捕湖廣沔陽等處湖廣荆襄
諸軍悉聽節制給還元追奪河南行省丞相宣命仍給
以功賞宣勅金銀牌面戊戌介休縣桃花己亥太陰
犯鬼宿戊申右丞相定住以病辭職命以太保就第治
病庚戌賊陷饒州路辛亥賜高麗國王伯顏帖木兒爲

親仁輔義宣忠奉國彰惠靖遠功臣是月答失八都魯
攻夾河賊大破之賊陷懷慶命河南行省右丞不花討
之以湖廣歸州改隸四川行省十二月壬子朔熒惑犯
房宿給湖廣行省分省印丁巳命中書參知政事月倫
失不花陳敬伯分省彰德癸亥立忠義忠勤萬戶府于
宿州武安州已巳以諸郡軍儲供餉繁浩命戶部印造
明年鈔本六百萬錠給之壬申以平章政事帖里帖木
兒右丞幹樂並知經筵事參議丁好禮兼經筵官乙亥
以天下兵起下詔罪已大赦天下是月答失八都魯大
敗劉福通等于太康浚 鄆亳州僞宋主遁于安豐立興

元等處宣慰使司都元帥府于興元路是歲薊州雨血
詔凡有水田之處設大兵農司招集人夫有警乘機進
討無事栽植播種詔濬大內河道以宦官同知留守墊
先帖木兒董其役墊先帖木兒言自十一年以來天下
多事不宜興作帝怒命往使高麗改命宦官答失蠻董
之以中書平章政事拜住分省濟寧設四部是歲察罕
帖木兒與賊戰于河南北屢有功除中書刑部侍郎
十六年春正月壬午改福建宣慰使司都元帥府爲福
建行中書省戊子親享太廟命中書平章政事帖里帖
木兒提調國子監己丑大陰犯昴宿丁酉太保定住以

病辭職太尉太宗正府扎魯忽赤月闕察兒以出軍中
傷辭職皆不允乙亥詔命太尉阿吉刺開府設官屬乙
巳以遼陽行省左丞相咬咬爲太子詹事翰林學士承
旨朶列帖木兒同知詹事院事丙子以知樞密院事實
理門兼大府監卿戊申雲南土官阿蘆降遣姪腮幹以
方物來貢庚戌左丞相哈麻罷辛亥御史大夫雪雪亦
罷以搠思監爲御史大夫復以定住爲右丞相是月薊
州地震倪文俊建僞都于漢陽迎徐壽輝據之二月癸
酉禿魯帖木兒辭職不允搠思監糾言哈麻及其弟雪
雪等罪惡帝曰哈麻兄弟雖有罪然侍朕日久與朕弟

懿璘質班皇帝實同乳且緩其罰令之出征自效甲寅
命右丞相定住依前太保中書一切機務悉聽總裁詔
天下丙辰以鎮南王孛羅不花自兵興以來率怯薛丹
計賊累立戰功賜鈔一萬錠定住及平章政事桑哥失
里等復奏哈麻兄弟罪惡遂命貶哈麻惠州安置雪雪
肇州安置尋杖殺之壬戌詹事伯撒里辭職乙丑禁銷
毀販賣銅錢丙寅命翰林國史院太常禮儀院定擬皇
后奇氏三代功臣諡號王爵甲戌命六部大司農司集
賢翰林國史兩院太常禮儀院祕書崇文國子都水監
侍儀司等正官各舉才堪守令者一人不拘蒙古色目

漢南人從中書省斟酌用之或任內害民受賊者舉官
量事輕重降職命蠻蠻為靖安王賜金印置王傅等官
已卯命集賢直學士楊俊民致祭曲阜孔子廟仍葺其
廟宇詔諭山東鹽法軍民毋得沮壞賜定住篤麟赤怯
薛丹三十名給衣糧馬疋草料是月高郵張士誠陷平
江路據之改平江路為隆平府遂陷湖州松江常州三
月辛巳復立酒課提舉司命中書平章政事帖里帖木
兒叅知政事成遵等議鈔法壬午徐壽輝復寇襄陽癸
未臺臣言係官牧馬草地俱為權豪所古今後除規運
總管府見種外餘盡取勘令大司農召募耕墾歲收租

課以資國用從之丁亥以今秋出師詔和買馬六萬疋
戊子命宣讓王帖木兒不花威順王寬徹普化以兵饋
過懷慶路各賜金一錠銀五錠幣帛九疋鈔二千錠庚
寅

大明兵取集慶路江南行臺御史大夫福壽死之丙申
倪文俊陷常德路總兵官俺都剌遁命搠思監提調承
徽寺丁酉立行樞密院于杭州命江浙行省左丞相達
識帖睦爾兼知行樞密院事節制諸軍省院等官並聽
調遣凡賞功罰罪招降討逆許以便宜行事
大明兵取鎮江路戊申方國珍復降以為海道運糧漕

運萬戶兼防禦海道運糧萬戶其兄方國璋爲衢州路
總管兼防禦海道事是月有兩日相盪夏四月辛亥以
搠思監爲中書左丞相丙辰以資正院使普化爲御史
大夫丁巳命左丞相搠思監領經筵事中書平章政事
悟良哈台御史大夫普化並知經筵事庚申以河南行
省左丞卜蘭奚爲湖廣行省平章政事咨失八都魯加
金紫光祿大夫丙寅命阿因班太子與陝西行省官同
討均房南陽遼陽行省平章政事奇伯顏不花加大司
徒丁卯以陝西行臺御史大夫朶朶爲陝西行省左丞
相大司農咬咬爲遼陽行省左丞相以知樞密院事實

理門分院濟寧翰林學士承旨脫脫同知詹事院事壬
申命豫王阿剌忒納失里與陝西行省官商議軍機從
宜攻討己卯命悟良哈台兼太子諭德是月車駕時巡
上都五月壬辰太白犯鬼宿癸巳亦如之甲午太陰入
斗宿丙申倪文俊陷澧州路丁酉太陰犯壘壁陣乙巳
賊寇辰州守將和尚以鄉兵擊敗之六月甲寅江浙行
省平章政事三旦八參知政事楊完者以兵守嘉興路
禦張士誠乙丑

大明兵取廣德路秋七月癸未以翰林學士禿魯帖木
兒爲侍御史丁酉太陰犯壘壁陣是月張士誠遣兵陷

杭州江浙行省平章政事左答納失里戰死丞相達識帖木邇遁楊完者及萬戶普賢奴擊敗之復其城八月丙辰奉元路判官王淵等以義兵復商州陞淵同知關商襄鄧等處宣慰司事己未賊侵河南府路參知政事洪丑驢以兵敗之丁卯太陰犯昴宿庚午倪文俊陷衡州路元帥甄崇福戰死甲戌彗星見張宿色青白彗指西南長尺餘至十二月戊午始滅是月車駕還自上都黃河決山東大水九月庚辰汝潁賊李武崔德等破潼關參知政事述律杰戰死壬午豫王阿剌忒納失里同知樞密院事定住引兵復潼關河南行省平章政事伯家奴以兵守之丙申潼關復陷伯家奴兵潰豫王阿剌忒納失里復以兵取之李武崔德敗走戊戌賊陷陝州及虢州詔以太尉納麟復爲江南行臺御史大夫遷行臺治紹興是月察罕帖木兒復陝州及虢州復襲敗賊兵于平陸安邑以功由兵部尚書陞僉河北行樞密院事冬十月丁未大名路有星如火從東南流芒尾如曳箠墮地有聲火燄蓬勃久之乃息化爲石青黑色光瑩形如狗頭其斷處如新割者命藏于庫壬辰太陰犯井宿是月詔罷太尉也先帖木兒十一月丙戌以老的沙答里麻失並爲詹事丁亥流星大如酒盃色青白尾跡

約長五尺餘光明燭地起自東北東南行沒于近濁有
聲如雷壬辰太陰犯井宿是月河南陷河南廉訪副使
俺普遁置河南廉訪司于沂州又於沂州設分樞密院
以兵馬指揮使司隸之十二月倪文俊陷岳州路殺威
順王子歹帖木兒湖廣參知政事也先帖木兒與左江
義兵萬戶鄧祖勝合兵復衡州是歲詔沿海州縣爲賊
所殘掠者免田租三年賜高年帛河南行省左丞相太
不花駐軍于南陽嵩汝等州叛民皆降軍勢大振陝西
行臺監察御史李尚綱上關中形勝急論凡十有二事
命大司農司屯種雄霸二州以給京師號京糧

元史卷四十四終

元史卷四十五 本紀第四十五

元史卷四十五

本紀第四十五

皇明翰林學士中大夫知制誥兼脩國史臣宋濂

濂

翰林待制承直郎同知制誥兼國史院編修管臣王禕等奉勅脩

禕等奉勅脩

順帝八

十七年春正月丙子朔日有食之以伯顏禿古思為大司徒辛卯命山東分省團結義兵每州添設判官一員每縣添設主簿一員專率義兵以事守禦仍命各路達魯花赤提調聽宣慰使司節制丙申監察御史哈刺章

康熙十五年重修

元史卷四十五

本紀

一

言淮東道廉訪使楮不華狗忠盡節宜加褒贈優恤其
家從之二月壬子賊犯七盤藍田命察罕帖木兒以軍
會答兒麻亦兒守陝州潼關哈刺不花由潼關抵陝西
會豫王阿刺忒納失里及定任等同進討癸丑太陰犯
五車以征河南許亳太康嵩汝大捷詔赦天下戊辰知
樞密院事脫脫復邳州調客省使撒兒答溫等攻黃河
南岸賊大破之壬申劉福通遣其黨毛貴陷膠州僉樞
密院事脫歡死之甲戌倪文俊陷陝州是月李武崔德
陷商州察罕帖木兒與李思齊以兵自陝號援陝西以
察罕帖木兒爲陝西行省左丞李思齊爲四川行省左
丞詔以高寶爲四川行省參知政事將兵取中興不克
賊遂破鞏驢關三月乙亥義兵萬戶審訥丁阿迷里丁
叛據泉州庚辰毛貴陷萊州守臣山東宣慰副使釋嘉
訥死之壬午

大明兵取常州路甲申太陰犯鬼宿壬辰歲星犯壘壁
陣甲午毛貴陷益都路益王買奴遁自是山東郡邑皆
陷乙未以江淮行樞密院副使董搏霄爲山東宣慰使
丁酉毛貴陷濱州戊戌以中書平章政事帖里帖木兒
爲御史大夫悟良哈台幹欒並爲中書平章政事夏四
月丙午監察御史五十九言今京師周圍雖設二十四

營軍卒疲弱素不訓練誠爲虛設儻有不測誠可寒心
宜速選擇驍勇精銳衛護大駕鎮守京師實當今莫安
根本固堅人心之急務况武備莫重于兵而養兵莫先
于食今朝廷撥降鈔錠措置農具命總兵官于河南克
復州郡且耕且戰甚合寓兵于農之意爲今之計權命
總兵官從宜于軍官府選委能撫字軍民者兼路府州
縣之職務要農事有成軍民得所則擾民之害益除而
匱乏之憂亦釋矣帝嘉納之乙卯毛貴陷莒州丙辰京
師立便民六庫倒易昏鈔辛酉以咬咬爲甘肅行省左
丞相答失八都魯加太尉四川行省左丞相漢中道兼
訪司糾陝西行省左丞蕭家奴遇賊逃竄失陷所守郡
邑詔正其罪是月車駕時巡上都封江西行省平章政
事火你赤爲營國公

大明兵取寧國路五月乙亥命知樞密院事孛蘭奚進
兵討山東戊寅平章政事亦老溫帖木兒復武安州等
三十餘城丙申命搠思監爲右丞相太平爲左丞相詔
天下免民今歲稅糧之半詔以永昌宣慰司屬詹事院
六月甲辰朔以實理門爲中書分省右丞守濟寧丙辰
監察御史脫脫穆而言去歲河南之賊窺伺河北惟河
南與山東互相策應爲害尤大爲今之計中書當遴選

能將就太不花答失八都魯阿魯三處軍馬內擇其精銳以守河北進可以制河南之侵退可以攻山東之寇庶幾無虞從之己未以帖里帖木兒老的沙並爲御史大夫庚申

大明兵取江陰州壬申帖里帖木兒糾陝西知行樞密院事也先帖木兒遂命罷陝西行樞密院令也先帖木兒居于草地癸酉温州路樂清江中龍起颶風作有火光如毬是月劉福通犯汴梁其軍分三道關先生破頭潘馮長舅沙劉二王士誠寇晉冀白不信大刀敖李喜喜趨關中毛貴據山東其勢大振秋七月己卯帖里帖

木兒奏續集風憲宏綱庚辰

大明兵取徽州路癸未太白犯鬼宿甲申太陰犯斗宿乙酉命右丞相搠思監領宣政院事平章政事減十知經筵事叅知政事李穰同知經筵事叅知政事完者帖木兒兼太府卿丁亥填星犯鬼宿戊子以李穰爲御史中丞中書省臣言山東般陽益都相次而陷濟南日危宜選將練卒信賞必罰爲保燕趙計以衛京師不報己丑鎮守黃河義兵萬戶田豐叛陷濟寧路分省右丞實理門遁義兵萬戶孟本周攻之田豐敗走本周還守濟寧甲午以御史中丞完者帖木兒爲中書右丞河南廉

訪使俺普爲中書叅知政事監察御史迭里彌實劉傑
言疆域日蹙兵律不嚴陝西汴梁淮潁山東之寇有窺
伺燕趙之志宜俯詢大臣共圖克復之宜預定守備之
策不報是月立四方獻言詳定使司秩正三品歸德府
知府林茂萬戶時公權叛以城降于賊歸德府及曹州
皆陷八月癸卯填星犯鬼宿太白犯軒轅癸丑劉福通
兵陷六名路遂自曹濮陷衛輝路答失八都魯之子孛
羅帖木兒與萬戶方脫脫擊之甲子太陰犯五車乙丑
以陝西行臺御史中丞伯嘉訥爲陝西行省平章政事
淮南行省叅知政事余闕爲淮南行省左丞江浙行省
參知政事楊完者陞左丞方國瑛爲江浙行省參知政
事海道運糧萬戶如故丙寅慶陽府鎮原州大雹是月
大駕還自上都薊州大水詔知樞密院事紐的該進討
山東
大明兵取揚州路平江路張士誠俾前江南行臺御史
中丞蠻子海牙爲書請降江浙左丞相達識帖睦爾承
制令參知政事周伯琦等至平江撫諭之詔以士誠爲
太尉士德爲淮南行省平章政事時士德已爲
大明兵所擒九月丙子命同知樞密院事壽童以兵討
冠州以老的沙爲中書省平章政事兼兀良海牙指揮

使甲午澤州陵川縣陷縣尹張輔死之戊戌太不花復
大名路并所屬郡縣辛丑詔中書右丞也先不花御史
中丞成遵奉使宣撫彰德大名廣平東昌東平曹濮等
處獎厲將師是月命紐的該加太尉總諸軍守禦東昌
時田豐據濟濮率衆來寇擊走之倪文俊謀殺其主徐
壽輝不果自漢陽奔黃州壽輝僞將陳友諒襲殺之友
諒遂自稱平章閏九月癸卯有飛星如盃青色光燭地
尾約長尺餘起自王良没于勾陳監察御史朶兒只等
劾奏知樞密院使哈剌八剌兒失陷所守郡縣詔正其
罪丙午太陰犯斗宿右丞相搠思監左丞相太平並加
開府儀同三司平章政事完者不花燕大司農庚申太
陰犯井宿乙丑路州陷丙寅賊攻冀寧察罕帖木兒以
兵擊走之冬十月乙亥熒惑犯氐宿戊寅設分詹事院
甲申太陰掩昴宿戊戌曹州賊入太行山是月白不信
大刀敖李喜喜陷興元遂入鳳翔察罕帖木兒李思齊
屢擊破之其黨走入蜀答失八都魯與知樞密院事答
里麻失里以軍討曹州賊官軍敗潰答里麻失里死之
靜江路山崩地陷大水十一月辛丑山東道宣慰使董
搏霄建言請令江淮等處各枝官軍分布連珠營寨于
隘口屯駐守禦宜廣屯田以足軍食從之汾州桃杏花

壬寅賊侵壺關察罕帖木兒大破之戊午以河南行省
平章政事答蘭爲中書平章政事御史中丞李獻爲中
書左丞陝西行臺中丞卜顏帖木兒樞密院副使哈刺
那海司農少卿崔敬侍御史陳敬伯皆爲參知政事癸
亥豫王阿刺忒納失里與陝西行省左丞相朶朶陝西
行臺御史中丞伯嘉訥分道攻討關陝己巳以中書參
知政事八都麻失里爲右丞十二月庚午熒惑犯天江
辛未山東道廉訪使伯顏不花建言嚴保伍集勇健汰
冗官戊寅太白犯歲星甲申太陰犯鬼宿丁亥歲星犯
壘壁陣庚寅太白犯壘壁陣癸巳太陰犯心宿丁酉慶

元路象山縣鵝鼻山崩己亥流星如金星大尾約長三
尺餘起自太陰近東而沒化爲青白氣庚子答失八都
魯卒于軍中是歲詔天下團結義兵路府州縣正官俱
兼防禦事詔淮南行知樞密院事脫脫領兵討淮南詔
諭濟寧李秉彝田豐等令其出降叙復元任彌亂士卒
仍給資糧欲還鄉者聽倪文俊陷川蜀諸郡命僞元帥
明玉珍守據之趙君用及彭大之子早住同據淮安趙
僭稱永義王彭僭稱魯淮王義兵千戶余寶殺其知樞
密院事實童以叛降于毛貴余寶遂據棣州河南大饑
十八年春正月辛丑填星犯鬼宿乙巳察罕帖木兒李

思齊合兵于鳳翔丙午太陰犯昴宿陳友諒陷安慶路
守將余闕死之庚戌

大明兵取婺源州甲子以不蘭奚知樞密院事乙丑大
風起自西北益都土門萬歲碑仆而碎丙寅田豐陷東
平路丁卯不蘭奚與毛貴戰于好石橋敗績走濟南是
月詔峇失八都魯子孛羅帖木兒爲河南行省平章政
事總領其父元管軍馬詔察罕帖木兒屯陝西李思齊
屯鳳翔二月己巳朔議團結西山寨大小十一處以爲
保障命中書右丞塔失帖木兒左丞烏古孫良楨等總
行提調設萬夫長千夫長百夫長編立牌甲分守要害

互相策應毛貴陷清滄州遂據長蘆鎮中書省臣奏以
陝西軍旅事劇務殷去京師道遠供費艱難請就陝西
印造寶鈔爲便遂分戶部寶鈔庫等官置局印造仍命
諸路撥降鈔本界平準行用庫倒易昏幣布于民間癸
酉毛貴陷濟南路守將愛的戰死毛貴立賓興院選用
故宮以姬宗周等分守諸路又于萊州立三百六十屯
田每屯相去三十里造大車百輛以挽運糧儲官民田
十止收二分冬則陸運夏則水運乙亥填星犯鬼宿辛
巳詔以太不花爲中書右丞相總兵山東壬午田豐復
陷濟寧路甲申輝州陷丙戌紐的該聞田豐逼近東昌

棄城走丁亥察罕帖木兒調兵復涇州平涼保鞏昌戊
子田豐陷東昌路庚寅王士誠自益都犯懷慶路周全
擊敗之辛卯以安童爲中書參知政事丁酉興元路陷
三月己亥朔日色如血加右丞相柳思監太保庚子毛
貴陷般陽路辛丑大同路夜黑氣蔽西方有聲如雷少
頃東北方有雲如火交射中天遍地俱見火空中有兵
戈之聲癸卯王士誠陷晉寧路總管杜賽因不花死之
甲辰察罕帖木兒遣賽因赤等復晉寧路己酉劉福通
遣兵犯衛輝李羅帖木兒擊走之庚戌毛貴陷薊州詔
徵四方兵入衛乙卯毛貴犯瀋州至棗林樞密副使達
國珍戰死遂畧柳林同知樞密院事劉哈刺不花以兵
擊敗之貴走據濟南丙辰

大明兵取建德路以周全爲湖廣行省參知政事統奧
魯等軍移鎮嵩州白龍寨翼寧路陷丁巳田豐陷益都
路辛酉大同諸縣陷察罕帖木兒遣關保等往擊之是
時賊分二道犯晉冀一出沁州一侵絳州乙丑以老章
爲太子少保夏四月甲申陳友諒陷龍興路省臣道童
火你赤棄城遁壬午田豐陷廣平路大掠退保東昌詔
令元帥方脫脫以兵復廣平癸未以諸處捷音屢至詔
頒軍民事宜十一條庚寅以翰林學士承旨蠻子爲嶺

北行省平章政事辛卯太白犯鬼宿甲午陳友諒遣王奉國陷瑞州路是月車駕時巡上都察罕帖木兒李思齊會宣慰張良弼郎中郭擇善宣慰同知拜帖木兒平章政事定任總帥汪長生奴各以所部兵討李喜喜于鞏昌李喜喜敗入蜀察罕帖木兒駐清湫李思齊駐斜坡張良弼駐秦州郭擇善駐崇信拜帖木兒等駐通渭定住駐臨洮各自除路府州縣官徵納軍需李思齊張良弼又同襲殺拜帖木兒分總其兵五月戊戌朔察罕帖木兒遣董克昌等以兵復冀寧以方國珍爲江浙行省左丞兼海道運糧萬戶詔察罕帖木兒還兵鎮冀寧李思齊殺同僉樞密院事郭擇善庚子賊兵踰太行察罕帖木兒部將闕保擊敗之以察罕帖木兒爲陝西行省右丞兼陝西行臺侍御史同知河南行樞密院事劉福通攻汴梁壬寅太白犯填星汴梁守將竹貞棄城遁福通等遂入城乃自安豐迎其僞主居之以爲都陳友諒遣康泰趙琮鄧克明等以兵寇邵武路甲辰命太尉阿吉剌爲甘肅行省左丞相乙巳闕保與賊戰于高平大敗之庚戌陳友諒陷吉安路壬子太陰犯斗宿癸丑監察御史七十等糾劾太保中書右丞相太不花乙卯詔削太不花官爵安置蓋州時太不花總兵山東以知

行樞密院悟良哈台代之命悟良哈台節制河北諸軍
河南行省平章政事周全節制河南諸軍辛酉陳友諒
兵陷撫州路甲子監察御史七十燕赤不花等劾中書
叅知政事燕只不花是月遼州蝗山東地震天雨白毛
察罕帖木兒自以劉尚質爲冀寧路總管六月戊辰朔
太不花伏誅察罕帖木兒調虎林赤關保同守潞州拜
察罕帖木兒陝西行省平章政事便宜行事庚辰關先
生破頭潘等陷遼州虎林赤以兵擊走之關先生等遂
陷冀寧路乙酉命左丞相太平督諸軍守禦京城便宜
行事是月汾州大疫秋七月丁酉朔周全據懷慶路以
叛附于劉福通時察罕帖木兒駐軍洛陽遣伯帖木兒
以兵守盩子城周全來戰伯帖木兒爲其所殺周全遂
盡驅懷慶民渡河入汴梁丁未太陰犯斗宿不蘭奚以
兵復般陽路已而復陷戊申太白晝見癸丑有賊兵犯
京城刑部郎中不花守西門夜開門擊退之己未劉福
通遣周全引兵攻洛陽守將登城以大義責全全愧謝
退兵劉福通殺之丙寅以完不花脫帖木兒爲中書
平章政事是月京師大水蝗民大饑八月丁卯朔江浙
行省平章政事三旦八遁于福建先是三旦八討饒州
貪財玩寇久而無功遂妄稱遷職福建行省至福建爲

廉訪僉事般若帖木兒所劾拘之興化路壬申太陰掩
心宿庚辰陳友諒兵陷建昌路辛巳義兵萬戶王信以
滕州叛降于毛貴甲申太陰掩昴宿庚寅以老的沙爲
御史大夫詔作新風紀九月丁酉朔詔授昔班帖木兒
同知河東宣慰司事其妻刺八哈敦雲中郡夫人子觀
音奴贈同知大同路事仍旌表其門閭先是昔班帖木
兒爲趙王位下同知怯忪口總管府事其妻嘗保育趙
王及是部落滅里叛欲殺王昔班帖木兒與妻謀以其
子觀音奴服王平日衣冠居王宮夜半夫妻衛趙王微
服遁去比賊至遂殺觀音奴趙王得免事聞故旌其忠
焉褒封唐贈諫議大夫劉普爲文節昌平侯關先生攻
保定路不克遂陷完州掠大同興和塞外諸郡中書左
丞張冲請立團練安撫勸農使司二道一奉元延安等
處一鞏昌等處從之壬寅詔命中書叅知政事普顏不
花治書侍御史李國鳳經畧江南癸卯詔以福建行中
書省平章政事慶童爲江南行臺御史大夫丙午賊兵
攻大同路壬戌平定州陷乙丑陳友諒陷贛州路江西
行省叅知政事全普庵撒里及總管哈海赤死之冬十
月丙寅朔詔豫王阿剌忒納失里徙居曰海尋遷六盤
壬申

大明兵取蘭溪州己卯太陰犯昴宿壬午監察御史燕
赤不花劾右丞相搠思監罪狀詔收其印綬乙酉監察
御史答兒麻失里王彝等復劾之請正其罪帝不聽壬
辰大同路陷達魯花赤完者帖木兒棄城遁十一月乙
未朔以普化帖木兒爲福建行省平章政事癸卯陳友
諒陷汀州路丙午太陰犯昴宿太白犯房宿丁未田豐
陷順德路先是樞密院判官劉起祖守順德糧絕劫民
財掠牛馬民強壯者令充軍弱者殺而食之至是城陷
起祖遂盡驅其民走于廣平辛酉太陰掩心宿十二月
乙丑朔日有食之癸酉關先生破頭潘寺陷上都焚宮

闕留七月轉畧往遼陽遂至高麗戊寅太白經天庚辰
察罕帖木兒遣樞密院判官瑣住進兵于遼陽癸未太
白經天甲申

大明兵取婺州路達魯花赤僧住浙東廉訪使楊惠死
之戊子太陰犯房宿

十九年春正月甲午朔陳友諒兵陷信州路守臣江東
廉訪副使伯顏不花的斤力戰死之

大明兵取諸暨州辛丑太陰犯昴宿乙巳以朶兒只班
爲中書平章政事丙午遼陽行省陷懿州路總管呂震
死之贈震河南行省左丞追封東平郡公察罕帖木兒

遣樞密院判官陳秉直八不沙將兵二萬守冀寧癸丑
流星如酒盃大有聲如雷三月辛巳樞密副使朵兒只
以賊犯順寧命張立將精銳由紫荆關出討命鴉鵲由
北口出迎敵甲申叛將梁炳攻辰州守將和尚擊敗之
以和尚爲湖廣行省參知政事賊由飛狐靈丘犯蔚州
庚寅御史臺臣言先是召募義兵費用銀鈔一百四十
萬錠多近侍權倖冒名關支率爲虛數乞令軍士凡已
領官錢者立限出征詔從之已而復止不行是月詔孛
羅帖木兒移兵鎮大同以爲京師捍蔽置大都督兵農
司仍置分司十道專督屯種以孛羅帖木兒領之所在
侵奪民田不勝其擾太不花潰散之兵數萬鈔掠山西
察罕帖木兒遣陳秉直分兵駐榆次招撫之其首領悉
送河南屯種三月癸巳朔陳友諒遣兵由信州畧衢州
復遣兵陷襄陽路辛丑京城北兵馬司指揮周哈刺歹
與林智和等謀叛事覺伏誅庚戌太陰犯房宿壬戌詔
定科舉流寓人名額蒙古色目南人各十五名漢人二
十名夏四月癸亥朔汾水暴漲賊陷金復等州司徒知
樞密院事佛家奴調兵平之甲子毛貴爲趙君用所殺
帝以天下多故卻天壽節朝賀詔羣臣曰朕方今宜敬
天地法祖宗以自脩省朕初度之日羣臣毋賀庚午左

丞相太平暨文武百官奏曰天壽節朝賀乃臣子報本
實合禮典今謙讓不受固陛下盛德然今軍旅征進君
臣名分正宜舉行不允壬申皇太子復率羣臣上奏曰
朝賀祝壽是祖宗以來舊行典故今不行有乖于禮帝
曰今盜賊未息萬姓荼毒正朕恐懼脩省敬天之時奈
何受賀以自樂乙亥御史大夫帖里帖木兒復奏曰天
壽朝賀之禮蓋出臣子之誠伏望陛下曲徇所請若朝
賀之後內庭燕集特賜除免亦古者人君減膳之意仍
乞宣示中書使內外知聖天子憂勤惕厲至于如此帝
曰爲朕缺于修省以致萬姓塗炭今復朝賀燕集是重
朕之不德當候天下安寧行之未晚卿等其無復言卒
不聽己丑賊陷寧夏路途畧靈武等處五月壬辰朔以
陝西行臺御史大夫完者帖木兒爲陝西行省左丞相
便宜行事丙申熒惑犯鬼宿丁酉皇太子奏請巡北邊
以撫綏軍民御史臺臣上疏固留詔從之壬寅察罕帖
木兒請今歲八月鄉試河南舉人及避兵儒士不拘籍
貫依河南省元定額數就陝州置貢院應試詔從之丙
午太陰犯天江丁未太陰犯斗宿是月察罕帖木兒大
發秦晉諸軍討汴梁圍其城山東河東河南關中等處
蝗飛蔽天人馬不能行所落溝塹盡平民大饑六月辛

已詔以宣徽使燕古兒爲御史大夫秋七月壬辰朔出
搆思監爲遼陽行省左丞相便宜行事丁酉太白犯上
將庚子詔以察罕腦兒宣慰司之地屬資正院有司毋
得差占察罕腦兒之地在世祖時隸忙哥歹太子四千
戶今從皇后奇氏請故以屬之資正院甲辰太白犯右
執法戊申命國王囊加歹中書平章政事佛家奴也先
不花知樞密院事黑驢等統領探馬赤軍進征遼陽已
酉太白犯左執法丙辰趙君用既殺毛貴其黨續繼祖
自遼陽入益都殺君用遂與其所部自相讎敵是月霸
州及介休縣靈石縣蝗八月辛酉朔倪文俊餘黨陷歸
州戊寅察罕帖木兒督諸將閻思孝李克韓虎林赤賽
因赤答忽脫因不花呂文完哲賀宗哲孫翥等攻破汴
梁城劉福通奉其僞主遁退據安豐已卯蝗自河北飛
渡汴梁食田禾一空詔以察罕帖木兒爲河南行省平
章政事兼同知河南行樞密院事陝西行臺御史中丞
依前便宜行事仍賜御衣七寶腰帶以旌其功是月大
同路蝗襄垣縣螟螽九月癸巳以中書平章政事帖里
帖木兒爲陝西行省左丞相便宜行事乙巳以湖南北
浙東西四道廉訪司所治之地皆陷詔任其所便之地
置司丙午夜白虹貫天丁未禁軍人不得私殺牛馬甲

寅太白犯天江是月

大明兵取衢州路詔遣兵部尚書伯顏帖木兒戶部尚書曹履亨以御酒龍衣賜張士誠徵海運糧冬十月庚申朔詔京師十一門皆築甕城造吊橋以方國珍爲江浙行省平章政事壬申太白犯斗宿辛巳流星大如桃十一月癸卯

大明兵取處州路戊申陳友諒兵陷杉關十二月戊辰太白犯壘壁陣是月知樞密院事兀良哈台領太不花軍其所部方脫脫與弟方伯帖木兒時保遼州兀良哈台同唐瑄高脫因等由孟州與察罕帖木兒部將八不

沙等交兵已而兀良哈台獨引達達軍還京師方脫脫等乃從孛羅帖木兒皇太子臧太平忤已以中書左丞成遵參知政事趙中皆太平所用使監察御史誣成遵趙中以賊罪杖殺之是歲以後因上都宮闕盡廢大駕不復時巡陳友諒以江州爲都迎僞主徐壽輝居之自稱漢王

二十年春正月己丑朔察罕帖木兒請以鞏縣改立軍州萬戶府招民屯種從之御史大夫老的沙御史中丞咬住奏今後各處從宜行事官員毋得陰挾私讎明爲舉索輒將風憲官吏擅自遷除侵擾行事沮壞臺綱從

之巳亥太陰犯井宿癸卯大寧路陷壬子以危素爲參
知政事乙卯會試舉人知貢舉平章政事八都麻失里
同知貢舉翰林學士承旨李好文禮部尚書許從宗考
試官國子祭酒張翥同考官太常博士傅亨等奏舊例
各處鄉試舉人三年一次取三百名會試取一百名今
歲鄉試所取比前數少止有八十八名會試三分內取
一分合取三十名如于三十名外添取五名爲宜從之
丙寅五色雲見移時二月戊午朔左丞相太平罷爲太
保守上都三月戊子朔田豐陷保定路彗星見東方甲
午廷試進士三十五人賜買住魏元禮進士及第其餘

出身有差乙巳冀寧路陷壬子以搠思監爲中書右丞
相夏四月庚申命大司農司都事樂元臣招諭田豐至
其軍爲豐所害丁卯太陰犯明堂辛未僉行樞密院事
張居敬復興中州癸酉太陰犯東咸五月丁亥朔日有
食之雨雹陳友諒殺其僞主徐壽輝於太平路遂稱皇
帝國號大漢改元大義已而回駐於江州乙未陳友諒
遣羅忠顯陷辰州己亥以絆住馬爲中書平章政事壬寅
太陰犯建星是月張士誠海運糧十一萬石至京師閏
月己未以太尉也帖木兒知經筵事以甘肅行省左丞
相阿吉刺爲太尉乙亥流星大如桃六月己丑命孛羅

帖木兒部將方脫脫守禦嵐興保德州等處詔今後察罕帖木兒與孛羅帖木兒部將毋得互相越境侵犯所守信地因而讐殺方脫脫不得出嵐興州境界察罕帖木兒亦不得侵其地癸巳太白犯井宿戊戌太陰犯建星是月

大明兵取信州路秋七月辛酉命遼陽行省參知政事張居敬討義州賊孛羅帖木兒敗賊王士誠於臺州乙丑太陰犯井宿乙亥詔孛羅帖木兒總領達達漢兒軍馬爲總兵官仍便宜行事八月戊子命孛羅帖木兒守石嶺關以北察罕帖木兒守石嶺關以南辛卯太陰犯

天江壬辰加封福建鎮閩王爲護國英仁武烈忠正福德鎮閩尊王乙未永平路陷壬辰填星犯太微甲辰太陰犯井宿詔諸處所在權攝官員專務漁獵百姓今後非朝廷允許不得之任庚戌詔江浙行省左丞相達識帖睦爾加太尉兼知江浙行樞密院事提調行宣政院事便宜行事九月乙卯朔詔遣參知政事也先不花往諭孛羅帖木兒察罕帖木兒令講和時孛羅帖木兒調兵自石嶺關直抵冀寧圍其城三日復退屯交城察罕帖木兒調參政閻奉先引兵與戰已而各于石嶺關南北守禦壬戌賊陷孟州又陷趙州攻真定路癸未賊復

犯上都右丞忙哥帖木兒引兵擊之敗績冬十月甲申朔甘露降于國子監大成殿前柏木以張良弼爲湖廣行省叅知政事討南陽襄樊詔孛羅帖木兒守冀寧孛羅帖木兒遣保保殷興祖高脫因倍道趨冀寧守者不納丙戌命迭兒必失爲太尉守衛大幹耳朶思戊子熒惑犯井宿己亥察罕帖木兒遣陳秉直瑣住等以兵攻孛羅帖木兒之軍于冀寧與孛羅帖木兒部將脫列伯戰敗之時帝有旨以冀寧界孛羅帖木兒察罕帖木兒以爲用兵數年惟藉冀晉以給其軍而致盛強苟奉旨與之則彼得以足其兵食乃託言用師汴梁尋渡河就屯澤潞拒之調延安軍交戰于東勝州等處再遣八不沙以兵援之八不沙謂彼軍奉旨而來我何敢抗王命察罕帖木兒怒殺之十一月甲寅朔黃河清凡三日孛羅帖木兒以兵侵汾州察罕帖木兒以兵拒之癸酉賊犯易州十二月丙戌詔太廟影堂祭祀乃子孫報本重事近兵興歲歉品物不能豐備累朝四祭減爲春秋二祭今宜復四祭後竟不行辛卯廣平路陷是歲陽翟王阿魯輝帖木兒擁兵數十萬屯于木兒古徹兀之地將犯京畿使來言曰祖宗以天下付汝汝已失其大半若以國璽付我我當自爲之帝遣報之曰天命有在汝欲

為則為之命樞密院事禿堅帖木兒等將兵擊之不克
軍士皆潰禿堅帖木兒走上都

元史卷四十五終

元史卷四十六

紀第四十六

皇明翰林學士雷夫知制誥兼脩國史臣宋濂

翰林待制承直郎同知制誥兼國史院編修官臣王禕等奉勅脩

順帝九

二十一年春正月癸丑朔詔赦天下命中書叅知政事
七十往諭孛羅帖木兒罷兵還鎮復遣使往諭察罕帖
木兒亦令罷兵孛羅帖木兒縱兵掠冀寧等處察罕帖
木兒以兵拒之故有是命庚申太陰犯歲星乙丑河南

康熙二十五年重修

元史卷四十六

本紀

一

賊犯杞縣察罕帖木兒討平之丁卯李思齊進兵平伏
羌縣等處癸酉石州大風拔木六畜俱鳴民所持槍忽
生火焰抹之卽無搖之卽有二月癸未朔填星退犯太
微垣甲申同僉樞密院事迭里帖木兒復永平灤州等
處己丑察罕帖木兒駐兵霍州攻孛羅帖木兒壬寅太
陰犯天江是月江南行臺侍御史八撒刺不花殺廣東
廉訪使完者篤副使李思誠僉事迭麥赤以兵自衛據
廣州時八撒刺不花以廉訪使久居廣東專恣自用詔
乃以完者篤等爲廉訪司官而除八撒刺不花侍御史
八撒刺不花不受命怒完者篤等代己卽誣以罪盡殺
之惟廉訪使董鑰哀請得免三月丙辰太陰犯井宿癸
酉察罕帖木兒調兵討永城縣又駐兵宿州擒賊將梁
綿住庚辰熒惑犯鬼宿是月張士誠海運糧一十一萬
石至京師孛羅帖木兒罷兵還遣脫列伯等引兵據延
安以謀入陝張良弼出南山義谷駐藍田受節制於察
罕帖木兒良弼又陰結陝西行省平章政事定住聽丞
相帖里帖木兒調遣營於鹿臺夏四月辛巳朔日有食
之是月以張良弼爲陝西行省叅知政事察罕帖木兒
遣其子副詹事擴廓帖木兒貢糧至京師皇太子親與
定約遂不復疑五月癸丑四川明玉珍陷嘉定等路李

思齊遣兵擊敗之壬戌太陰犯房宿癸酉太白犯軒轅
甲戌熒惑犯太白乙亥察罕帖木兒以兵侵孛羅帖木
兒所守之地是月李思齊受李武崔德等降六月乙未
熒惑歲星太白聚于翼宿丙申察罕帖木兒總兵討山
東發晉軍下井陘出邯鄲過磁相懷衛踰白馬津發其
軍之在汴梁者繼之水陸並進戊戌太陰犯雲雨甲辰
太白晝見秋七月辛亥察罕帖木兒平東昌巳巳忻州
西北有赤氣蔽天如血是月察罕帖木兒進兵復冠州
八月乙酉大同路北方夜有赤氣蔽天移時方散庚子
以福建行省平章政事普化帖木兒爲江南行臺御史

大夫癸卯

大明兵取江州路時僞漢陳友諒據江州爲都至是退
都武昌是月察罕帖木兒遣其子擴廓帖木兒闔思孝
等會關保虎林赤等將兵由東河造浮橋以濟賊以二
萬餘衆奪之關保虎林赤且戰且渡拔長清討東平東
平僞丞相田豐遣崔世英等出戰大破之乃遣使招諭
田豐豐降東平平令豐爲前鋒從大軍東討棣州俞寶
降東平王士誠東昌楊誠等皆降魯地悉定進兵濟南
劉珪降遂圍益都九月戊午陽翟王阿魯輝帖木兒伏
誅阿魯輝帖木兒以宗親見天下盜賊並起遂成間隙

肆爲異圖詔少保知樞密院事老章率諸軍討之老章
遂敗其衆尋爲部將同知太常禮儀院事脫驪所擒送
闕下詔誅之于是詔加老章太傅和寧王以阿魯輝帖
木兒之弟忽都帖木兒襲封陽翟王宗王囊加玉樞虎
兒吐華與脫驪悉議加封壬戌四川賊兵陷東川郡縣
李思齊調兵擊之壬申命孛羅帖木兒於保定以東河
間以南從便屯種是月命兵部尚書徹徹不花侍郎韓
禕徵海運糧于張士誠

大明取建昌饒州二路冬十月癸巳絳州有赤氣見北
方如火以察罕帖木兒爲中書平章政事兼知河南山
東等處行樞密院事陝西行御史臺中丞察罕帖木兒
調叅知政事陳秉直劉珪等守禦河南十一月戊申朔
温州樂清縣雷庚戌太陰犯建星癸亥太陰犯井宿戊
辰黃河自平陸三門磧下至孟津五百餘里皆清凡七
日命祕書少監程徐祀之壬申太陰犯氐宿是月察罕
帖木兒李思齊遣兵圍鹿臺攻張良弼詔和解之俾各
還信地兵乃解是歲京師大饑屯田成叔糧四十萬石
賜司農丞胡秉彝上尊金幣以旌其功
二十二年春正月戊申朔太白犯建星甲寅詔李思齊
討四川張良弼平襄漢時兩軍不和故有是命乙卯填

星退犯左執法庚申

大明取江西龍興諸路時江西諸路皆陳友諒所據丁卯詔以太尉完者帖木兒爲陝西行省左丞相仍命察罕帖木兒屯種于陝西申諭李思齊張良弼等各以兵自効以也先不花爲中書右丞二月丁丑朔盜殺陝西行省右丞塔不歹巳卯太白犯壘壁陣乙酉彗星見于危宿光芒長丈餘色青白丁酉彗星犯離宮西星至二月終光芒長二丈餘是月知樞密院事禿堅帖木兒奉詔諭李思齊討四川時思齊退保鳳翔使至思齊進兵益門鎮使還思齊復歸鳳翔三月戊申彗星不見星形

惟有白氣形曲竟天西指掃大角壬子彗星行過太陽前惟有星形無芒在昴宿至戊午始滅甲寅四川明玉珍陷雲南省治屯金馬山陝西行省叅知政事車力帖木兒等擊敗之擒明玉珍弟明二巳未御史大夫老的沙辭職不許是月命孛羅帖木兒爲中書平章政事位第二加太尉張良弼受節制孛羅帖木兒李思齊遣兵攻良弼至于武功良弼以伏兵大破之夏四月丙子朔長星見其形如練長數十丈在虛危之間後四十餘日乃滅丁亥熒惑離太陽三十九度不見當出不出巳丑詔諸王駙馬御史臺各衙門不許占匿人民不當差

役乙未賊新橋張陷安州字羅帖木兒來請援兵是月
紹興路大疫五月乙巳朔泉州審甫丁據福州路福建
行省平章政事燕只不花擊敗之餘衆航海還據泉州
福建行省叅知政事陳有定復汀州路己未中書叅知
政事陳祖仁上章乞罷脩上都宮闕辛酉太陰犯建星
辛未明玉珎據成都自稱隴蜀王遣僞將楊尚書守重
慶分兵寇龍州青州犯興元鞏昌等路是月張士誠海
運糧一十三萬石至京師六月辛巳彗星見紫微垣光
芒長尺餘東南指西南行戊子彗星光芒掃上宰田豐
及王士誠刺殺察罕帖木兒遂走入益都城衆乃推察
罕帖木兒之子擴廓帖木兒爲總兵官復圍益都詔贈
察罕帖木兒推誠定遠宣忠亮節功臣開府儀同三司
上柱國河南行省左丞相追封忠襄王謚獻武食邑沈
丘縣令河南山東等處立廟長吏歲時致祭其父司徒
阿都溫賜良田二百頃其子擴廓帖木兒授光祿大夫
中書平章政事兼知河南山東等處行樞密院事同知
詹事院事一應軍馬並聽節制仍詔諭其將士曰凡爾
將佐久爲察罕帖木兒從事惟恩與義寔同骨肉視彼
逆黨不共戴天當力圖報復以伸大義己亥益都賊兵
出戰擴廓帖木兒生擒六百餘人斬首八百餘級秋七

月乙卯彗星滅跡丙辰熒惑見西方須臾成白氣如長
蛇光炯有文橫亘中天移時乃滅是月河決范陽縣漂
民居八月己亥擴廓帖木兒言孛羅帖木兒張良弼據
延安掠黃河上下欲東渡以奪晉寧乞賜詔諭癸巳太
白犯畢宿九月癸卯朔劉福通以兵援田豐至火星墀
擴廓帖木兒遣關保邀擊大破之甲辰以山北廉訪司
權置于惠州丁未太白犯亢宿己酉太陰犯斗宿丁亥
歲星犯軒轅丙寅熒惑犯鬼宿戊辰以也速爲遼陽行
省左丞相依前總兵撫安迤東鄆縣己巳有流星如酒
盃色青白光明燭地熒惑犯鬼宿積屍氣冬十月壬申

朔江西行省平章朵列不花移檄討八撒刺不花時朵
列不花分省廣州適邵宗愚陷廣州執八撒刺不花殺
之甲戌孛羅帖木兒南侵擴廓帖木兒所守之地遂據
真定路己卯太陰犯牛宿丁亥辰星犯亢宿戊子太陰
犯畢宿十一月乙巳擴廓帖木兒復益都田豐等伏誅
自擴廓帖木兒旣襲父職身率將士誓必復讎人心亦思
自奮圍城益急賊悉力拒守乃以壯士穴地通道而入
遂克之盡誅其黨取田豐王士誠之心以祭察罕帖木
兒庚戌擴廓帖木兒遣關保復莒州山東悉平庚申詔
授擴廓帖木兒太尉銀青榮祿大夫中書平章政事知

樞密院事太子詹事便宜行事襲總其父兵將校士卒
論賞有差察罕帖木兒父阿魯溫進封汝陽王察罕帖
木兒改贈宣忠興運弘仁効節功臣追封潁川王改謚
忠襄癸亥四川賊兵陷青川十二月壬辰太陰犯角宿
庚子以中書平章政事佛家奴爲御史大夫是歲樞密
副使李士瞻上疏極言時政凡二十條一曰悔已過以
詔天下二曰罷造作以快人心三曰御經筵以講聖學
四曰延老成以詢治道五曰去姑息以振乾剛六曰開
言路以求得失七曰明賞罰以厲百司八曰公選舉以
息奔競九曰察近侍以杜奸弊十曰嚴宿備以備非常
十一曰省佛事以節浮費十二曰絕濫賞以足國用十
三日罷各宮屯種俾有司經理十四曰減常歲計置爲
諸官用度十五曰招集散亡以實八衛之兵十六曰廣
給牛具以備屯田之用十七曰獎勵守令以勸農務本
十八曰開誠布公以禮待藩鎮十九曰分遣大將急保
山東二十曰依唐廣寧故事分道進取先是薊國公脫
火赤上言乞罷三宮造作帝爲減軍匠之半還隸宿衛
而造作如故故士瞻疏首及之皇太子常坐清寧殿分
布長席列坐西番高麗諸僧皇太子曰李好文先生教
我儒書多年尚不省其義今聽佛法一夜卽能曉焉于

是頗崇尚佛學帝以讒廢高麗王伯顏帖木兒立塔思帖木兒爲王國人上書言舊王不當廢新王不當立之故初皇后竒氏宗族在高麗恃寵驕橫伯顏帖木兒屢戒飭不悛高麗王遂盡殺竒氏族皇后謂太子曰爾年已長何不爲我報讎時高麗王昆弟有留京師者乃議立塔思帖木兒爲王而以竒族子三寶奴爲元子以將作同知崔帖木兒爲丞相以兵萬人送之國至鴨綠江爲高麗兵所敗僅餘十七騎還京師詔加封唐撫州刺史南庭王危全諷爲南庭忠烈靈惠王

二十三年春正月壬寅朔四川明王瑄僭稱皇帝建國

號曰大夏紀元曰天統乙巳大寧階庚戌歲星犯軒轅二月戊戌太白晝見庚子亦如之是月擴廓帖木兒自益都領兵還河南留鎖住以兵守益都以山東州縣立屯田萬戶府三月辛丑朔彗星見東方經月乃滅詔中書平章政事愛不花分省董寧擴廓帖木兒遣兵據之丙午大赦天下丁未親試進士六十二人賜寶寶楊觀進士及第餘出身有差丙辰太白犯氏宿壬戌大同路夜有赤氣亘天中侵北斗是月立廣西行中書省以廉訪使也兒吉尼爲平章政事時南方郡縣多陷沒惟也兒吉尼獨保廣西者十五年立膠東行中書省及行樞

密院總制東方事以袁宏爲叅知政事是春關先生餘
黨復自高麗還寇上都孛羅帖木兒擊降之夏四月辛
丑災惑犯歲星孛羅帖木兒李思齊互相交兵庚申歲
星犯軒轅是月擴廓帖木兒遣豹高等以兵擊張良弼
五月己巳朔張士誠海運糧十三萬石至京師壬午太
白晝見甲午亦如之乙未災惑犯右執法是月爪哇遣
使淡濛加加殿進金表貢方物六月戊戌朔孛羅帖木
兒遣方脫脫迎匡福於彰德擴廓帖木兒遣兵追之敗
還匡福遂據保定路己亥擴廓帖木兒部將歹驢等駐
兵藍田七盤李思齊攻圍興平遂據蓋屋孛羅帖木兒
時奉詔進討襄漢而歹驢阻道于前思齊踵襲于後乃
請催督擴廓帖木兒東出潼關道路既通即便南討戊
申孛羅帖木兒遣竹貞等入陝西據其省治時陝西行
省右丞荅失鐵木兒與行臺有隙且恐陝西爲擴廓帖
木兒所據陰結於孛羅帖木兒請竹貞入城劫御史大
夫完者帖木兒及監察御史張可遵等印其後屢使召
完者帖木兒貞拘留不遣擴廓帖木兒遣部將豹高等
李思齊合兵攻之竹貞出降遂從擴廓帖木兒庚戌星
隕于濟南龍山入地五尺甲寅詔授江南下第及後期
舉人爲路府州儒學教授乙卯太白犯井宿丁巳絳州

有白虹二道衝于牛間庚申平陽路有白氣三道一貫
北極一貫北斗一貫天漢至夜分乃滅壬戌太白晝見
夜犯井宿秋七月戊辰朔京師大雹傷禾稼丁丑以馬
良爲中書叅知政事乙酉太白晝見有星墜于慶元路
西北聲如雷光芒數十丈久之乃滅八月丁酉朔倭人
寇蓬州守將劉暹擊敗之自十八年以來倭人連寇瀕
海郡縣至是海隅遂安辛丑擴廓帖木兒遣兵侵寧羅
帖木兒所守之境壬寅太白犯軒轅乙巳太陰犯建星
丁未太白犯軒轅己酉太白晝見丙辰太陰犯畢宿沂
州有赤氣亘天中有白色如蛇形徐徐西行至夜分乃
滅戊午寧羅帖木兒言擴廓帖木兒踵襲父惡有不臣
之罪乞賜處置己未太白晝見辛酉太白犯歲星乙丑
太白犯右執法是月

大明兵與僞漢兵大戰于鄱陽湖陳友諒敗績而死其
子理自立仍據武昌爲都改元德壽

大明兵遂進圍武昌九月丁卯朔遣爪哇使淡濛加加
殿還國詔賜其國主三珠金虎符及織金紋幣辛未太
白犯左執法乙亥歲星犯右執法丁丑辰星犯填星丁
亥太白犯填星辰星犯亢宿是月張士誠自稱吳王來
請命不報遣戶部侍郎博羅帖木兒等徵海運于張士

誠士誠不與冬十月丙申朔青齊一方赤氣千里癸卯
太白犯氐宿甲辰湖廣僞姚平章張知院陰遣人言於
擴廓帖木兒設計擒殺僞漢主陳理及僞夏主明玉珎
不果已酉監察御史米只兒海牙劾奏太傅太平罪狀
詔安置太平于陝西之西仍拘收宣命并御賜等物戊
午太白犯房宿是月擴廓帖木兒遣僉樞密院事任亮
復安陸府字羅帖木兒遣兵攻冀寧至石嶺關擴廓帖
木兒大破走之擒其將烏馬兒殷興祖字羅帖木兒軍
由是不振十一月壬申御中臺臣言故右丞相脫脫有
大臣之體向在中書政務脩舉深懼滿盈自求引退加
封鄭王固辭不受再秉鈞軸克濟艱危統軍進征平徐
州收六合大功垂成浮言搆難奉詔謝兵就貶以沒已
蒙錄用其子還所籍田宅更乞憫其勲舊還其所授宣
命從之癸未太陰犯軒轅歲星犯左執法是歲御史大
夫老的沙與知樞密院事禿堅帖木兒得罪于皇太子
皆奔大同字羅帖木兒匿之營中
二十四年春正月戊寅太白犯軒轅庚辰保德州民家
產豬一頭兩腳二月壬子歲星犯左執法癸丑太陰犯
西咸池是月
大明滅僞漢其所據湖南北江西諸郡皆降于

大明三月乙亥監察御史王朶列禿崔卜顏帖木兒等
諫皇太子勿親征辛卯詔以孛羅帖木兒匿老的沙謀
爲悖逆解其兵權削其官爵候道路開通許還四川田
里孛羅帖木兒拒命不受夏四月甲午朔命擴廓帖木
兒討孛羅帖木兒乙未太陰犯西咸池孛羅帖木兒悉
知詔令調遣之事非出帝意皆右丞相搠思監所爲遂
令禿堅帖木兒舉兵向闕壬寅禿堅帖木兒兵入居庸
關癸卯知樞密院事也速詹事不蘭奚迎戰于皇后店
不蘭奚力戰也速不援而退不蘭奚幾爲所獲脫身東
走甲辰皇太子率侍衛兵出光熙門東走古北口趨興
松乙巳禿堅帖木兒兵至清河列營時都城無備城中
大震令百官吏卒分守京城使達達國師至其軍問故
以必得搠思監及宦官朴不花爲對詔慰解之不聽丁
未詔孛思監于嶺北竄朴不花于甘肅執而與之復
孛羅帖木兒前官仍總兵以也速爲左丞相庚戌禿堅
帖木兒陳兵自健德門入覲帝于延春閣慟哭請罪帝
就宴賚之加孛羅帖木兒太保依前守禦大同禿堅帖
木兒爲中書平章政事辛亥禿堅帖木兒軍還皇太子
至路兒嶺詔追及之還宮癸丑太白犯井宿甲子黃河
清戊辰擴廓帖木兒奉命討孛羅帖木兒屯兵冀寧其

東道以白鎖住領兵三萬守禦京師中道以貊高竹貞
領兵四萬西道以關保領兵五萬合擊之關保等兵逼
大同孛羅帖木兒留兵守大同而自率兵與禿堅帖木
兒老的沙復大舉向闕甲戌太白犯鬼宿乙亥又犯積
屍氣歲星犯左執法六月癸卯三星晝見白氣橫突其
中甲辰河南府有大星夜見南方光如晝丁未大星隕
照夜如晝及日黑氣晦暗如夜甲寅白鎖住以兵至京
師請皇太子西行丁巳太白犯右執法是月保德州黃
龍見井中秋七月癸亥太白與歲星合于翼宿甲子歲
星犯左執法丙戌孛羅帖木兒前鋒軍入居庸關皇太
子親率軍禦于清河也速軍于昌平軍士皆無鬪志皇
太子馳還都城白鎖住引兵入平則門丁亥白鎖住扈
從皇太子出順承門由雄霸河間取道往冀寧戊子孛
羅帖木兒駐兵健德門外與禿堅帖木兒老的沙入見
帝于宣文閣訴其非罪皆泣帝亦泣乃賜宴孛羅帖木
兒欲追襲皇太子老的沙止之庚寅詔以孛羅帖木兒
爲中書左丞相老的沙爲中書平章政事禿堅帖木兒
爲御史大夫其部屬布列省臺百司以也速知樞密院
事詔諭孛羅帖木兒擴廓帖木兒俱朕股肱視同心膂
自今各棄宿忿弼成大勳是月

大明兵取廬州路八月壬辰朔日有食之乙未熒惑犯
鬼宿壬寅詔以李羅帖木兒爲中書右丞相監修國史
節制天下軍馬乙巳皇太子至冀寧乙卯張士誠自以
其弟士信代達識帖睦迺爲浙江行省左丞相是月李
羅帖木兒請誅狎臣秃魯帖木兒波迪哇兒禡罷三宮
不急造作沙汰宦官減省錢糧禁止西番僧人好事九
月辛酉朔宦官思龍宜潛送宮女伯忽都出自順承門
以達于皇太子乙丑太白晝見癸酉夜天西北有紅光
至東而散甲申太陰犯軒轅是月

大明兵取中興及歸峽潼衡等路冬十月丙午太陰犯
畢宿巳酉太陰犯井宿巳未詔皇太子還京師命也速
老的沙分道總兵十二月乙卯太陰犯太白

二十五年春正月癸亥封李思齊爲許國公丙寅太白
晝見戊辰亦如之巳巳

大明兵取寶慶路守將唐隆道遁走僞漢守將熊天瑞
以贛州及韶州南雄降于

大明甲戌太白犯建星壬午監察御史李羅帖木兒賈
彬等辯明哈麻雪雪之罪二月辛丑汴梁路見日傍有
一月一星丙午太陰犯填星戊午皇太子在冀寧命甘
肅行省平章政事朵兒只班以岐王阿剌乞兒軍馬會

平章政事臧卜李思齊各以兵守寧夏三月庚申皇太子下令于擴廓帖木兒軍中曰李羅帖木兒襲據京師余既受命總督天下諸軍恭行顯罰少保中書平章政事擴廓帖木兒躬勒將士分道進兵諸王駙馬及陝西平章政事李思齊等各統軍馬尚其奮義戮力剋期恢復丙寅李羅帖木兒幽置皇后奇氏于諸色總管府丁卯命老的沙別帖木兒並爲御史大夫戊辰太白犯壘壁陣夏四月庚寅李羅帖木兒至諸色總管府見皇后奇氏令還宮取印章作書遺皇太子遣內侍官完者禿持往冀寧復出皇后幽之乙巳關保等兵進圍大同壬子熒惑犯靈臺乙卯關保入大同五月辛酉熒惑犯太微垣甲子京師天雨鼈尾長尺許或言于帝曰龍絲也命拾而祀之乙亥

大明兵破安陸府守將任亮迎戰被執己卯

大明兵破襄陽路是月侯卜延谷失奉威順王自雲南經蜀轉戰而出至成州欲之京師李思齊俾屯田于成州六月戊子以黎安道爲中書叅知政事辛丑湖廣行省左丞周文貴復寶慶路乙巳皇后奇氏自幽所還宮乙卯以太尉火你赤爲御史大夫是月皇太子加李思齊銀青榮祿大夫邠國公中書平章政事皇太子詹事

兼四川行樞密院事虎符招討使分中書四部秋七月
丁丑填星歲星熒惑聚于角亢太陰犯畢宿巳卯太陰
犯畢宿乙酉孛羅帖木兒伏誅禿堅帖木兒老的沙皆
遁走丙戌遣使函孛羅帖木兒首往冀寧召皇太子還
京師大赦天下黎安道方脫脫雷一聲皆伏誅是月京
師大水河決小流口達于清河八月丁亥朔京城門至
是不開者三日竹貞豹高軍至城外命軍士緣城而上
碎平則門鍵悉以軍入占民居奪民財乙未太陰犯建
星巳亥太白犯壘壁陣癸卯詔命皇太子分調將帥戡
定未復郡邑卽還京師行事之際承制用人並准正授

丁未皇后弘吉刺氏崩壬子以洪寶寶帖吉思不花捏
烈禿並爲中書平章政事九月擴廓帖木兒扈從皇太
子至京師丁丑太陰犯井宿壬午詔以伯撒里爲太師
中書右丞相監修國史擴廓帖木兒爲太尉中書左丞
相錄軍國重事同監修國史知樞密院事兼太子詹事
是月以方國珍爲淮南行省左丞相分省慶元冬十月
辛卯熒惑犯天江壬寅以哈刺章爲知樞密院事丁未
益王渾都帖木兒樞密副使觀音奴擒老的沙誅之禿
堅帖木兒以餘兵往八兒思之地命嶺北行省左丞相
山僧及知樞密院事魏賽因不花同討之戊申以資政

院使禿魯爲御史大夫己酉熒惑犯斗宿太陰犯右執法庚戌太陰犯太微垣閏月庚申以宿國公五十八爲知樞密院事詔張良弼俞寶孔興等悉聽調於擴廓帖木兒戊辰太白辰星熒惑聚于斗宿太陰犯畢宿辛未詔封擴廓帖木兒河南王代皇太子親征總制關陝晉冀山東等處并迤南一應軍馬諸王各愛馬應該總兵統兵領兵等官凡軍民一切機務錢糧名爵黜陟予奪悉聽便宜行事壬申太白犯辰星辛巳以脫脫木兒爲中書右丞達識帖睦迺爲叅知政事己丑太白犯熒惑太陰犯壘壁陣丙申太陰犯畢宿癸卯太陰犯太微垣

是月

大明兵取泰州時泰州通州高郵淮安徐州宿州泗州濠州安豐諸郡皆張士誠所據十二月乙卯詔立次皇后竒氏爲皇后改竒氏爲肅良合氏詔天下仍封竒氏父以上三世皆爲王爵癸亥太陰犯畢宿以帖林沙爲中書叅知政事庚子歲星掩房宿辛未太陰犯右執法是月禿堅帖木兒伏誅

元史卷四十六終

元史卷四十七

本紀第四十七

皇明翰林學士雷太夫知制誥兼脩國史臣宋濂

翰林待制承直郎知制誥兼國史院編脩官王禕等奉勅脩

順帝十

二十六年春正月己酉以崇政院使孛羅沙為御史大夫壬子以完者木知樞密院事是月以沙藍答里為中書左丞相命燕南河南山東陝西河東等處舉人會試者增其額數進士及第以下迺升官一級二月癸丑朔

康熙三十五年重修

元史卷四十七

本紀

立河淮水軍元帥府於孟津縣甲戌詔天下以比者逆
臣李羅帖木兒禿堅帖木兒老的沙等干紀亂倫內外
之民經值軍馬致使困乏與免一切雜泛差徭是月擴
廓帖木兒還河南分立省部以自隨尋居懷慶又居彰
德調度各處軍馬陝西張良弼拒命三月癸未朔罷洛
陽嵩縣宣慰司丁亥白虹五道亘天其第三道貫日又
有氣橫貫東南良久始滅甲午擴廓帖木兒遣關保虎
林赤以兵西攻張良弼于鹿臺李思齊脫烈伯孔興等
兵皆與良弼合以蠻子脫脫木兒知樞密院事乙未廷
試進士七十二人賜赫德溥化張棟進士及第餘出身
有差監察御史玉倫普建言八事一曰用賢二曰申嚴
宿衛三曰保全臣子四曰八衛屯田五曰禁止奏請六
曰培養人才七曰罪人不孥八曰重惜名爵帝嘉納之
是月

大明兵取高郵府夏四月辛酉詔立皇太子妃瓦只刺
孫答里氏是月

大明兵取淮安路徐州宿州濠州泗州潁州安豐路五
月壬午朔洛陽瑞麥生一莖四穗甲辰以脫脫不花爲
御史大夫六月壬子朔汾州介休縣地震平遙縣大雨
雹紹興路山陰縣臥龍山裂己未命知樞密院事買間

以兵守直沽命河間鹽運使拜住曹履亨撫諭沿海竈戶俾出丁夫從買閭征討丙寅詔英宗時謀爲不軌之臣其子孫或成丁者可安置舊地幼者隨母居草地終身不得入京城及不得授官止許於本愛馬應役皇后肅良合氏生日百官進箋皇后諭沙藍答里等曰自世祖以來正宮皇后壽日不曾進箋近年雖行不合典故却之秋七月辛巳朔日有食之徐溝縣地震介休縣大水石州大星如斗自西南而落甲申以李思齊爲太尉甲午太白經天丙申擴廓帖木兒遣朱珍盧旺屯兵河中遣關保虎林赤合兵渡河會竹貞商嵩且約李思齊以攻張良弼良弼遣子弟質于思齊與良弼拒守關保等不利思齊請詔和解之丙午太白經天八月戊寅以李國鳳爲中書左丞陳友定爲福建行省平章政事九月甲申李思齊兵下鹽井獲川賊余繼隆誅之禮部侍郎滿尚賓吏部侍郎掩篤刺哈自鳳翔還京師先是尚賓等持詔諭思齊開通川蜀道路思齊方兵爭不奉詔尚賓等留鳳翔一年至是始還丙戌以方國珍爲江浙行省左丞相弟國瑛國珉姪明善並爲江浙行省平章政事己亥以中書平章政事失列門爲御史大夫辛丑李星見東北方冬十月甲子擴廓帖木兒遣其弟脫因

帖木兒及貊高完哲等駐兵濟南以控制山東十一月
甲申

大明兵取湖州路丙申

大明兵取杭州路及紹興路辛丑

大明兵取嘉興路時湖州杭州紹興嘉興松江平江諸
路及無錫州皆張士誠所據十二月庚午蒲城洛水和
順崖崩

二十七年春正月乙未絳州夜聞天鼓鳴將旦復鳴其
聲如空中戰鬪者庚子

大明兵取松江府癸卯

大明兵取沅州路是月李思齊張良弼脫州伯自會于
含元殿基推李思齊爲盟主同拒擴廓帖木兒二月庚
申以買住爲雲國公七十爲中書平章政事月魯不花
爲御史大夫乙丑以詹事月魯帖木兒爲御史大夫三
月丁丑朔萊州大風有大鳥至其翅如席擴廓帖木兒
遣兵屯滕州以禦王信庚子京師大風自西北起飛砂
揚礫白日昏暗夏五月丙子朔白氣二道亘天以去歲
水潦霜災嚴酒禁戊寅以空名宣勅遣福建行省命平
章政事曲出陳友定同驗有功者給之辛巳大同隕霜
殺麥癸未福建行宣政院以廢寺錢糧由海道送京師

乙酉以完者帖木兒爲中書右丞相辭以老病不許辛
卯以知樞密院事失列門爲嶺北行省左丞相提調分
通政院己亥以俺普爲中書平章政事辛丑擴廓帖木
兒定擬其所屬官員二千六百一十人從之是月山東
地震雨白雉李思齊遣張良弼部將郭謙等守黃連寨
擴廓帖木兒部將關保虎林赤商嵩竹貞引兵拔其寨
郭謙走會貊高等爲變關保虎林赤夜遁李思齊遂解
而西六月丙午朔日有食之晝晦丁巳皇太子寢殿後
新甃井中有龍出光燄爍人宮人震懼仆地又長慶寺
有龍纏繞槐樹飛去樹皮皆剝丁卯沂州山崩是月知

樞密院事壽安奉空名宣勅與侯伯顏達世令其以兵
援擴廓帖木兒時李思齊據長安與商嵩拒戰侯伯顏
達世進兵攻李思齊秦州守將蕭公達降思齊思齊知
關保等兵退遣蔡琳等破其營侯伯顏達世奔潰秋七
月甲申命也速提調武備寺丁酉絳州星隕光耀如晝
是月李思齊遣許國佐薛穆飛會張良弼脫列伯兵屯
于華陰時命禿魯爲陝西行省左丞相思齊不悅遣其
部將鄭應祥守陝西而自還鳳翔龍見於臨胸龍山大
石起立八月丙午詔命皇太子總天下兵馬其畧曰元
良重任職在撫軍稽古徵今卓有成憲曩者障塞決河

本以拯民昏墊豈期妖盜積造訛言簧鼓愚頑塗炭郡
邑殆遍海內茲逾一紀故察罕帖木兒仗義興師獻功
敵愾汎掃汴洛克平青齊爲國捐軀深可哀悼其子擴
廓帖木兒克繼先志用成駿功愛敬識理達臈計安宗
社累請出師朕以國本至重詎宜輕出遂授擴廓帖木
兒總戎重寄昇以王爵俾代其行李思齊張良弼等各
懷異見構兵不已以至盜賊愈熾深遺朕憂况全齊密
邇輦轂儻失早計恐生異圖詢諸衆謀僉謂皇太子聰
明仁孝文武兼資聿遵舊典爰命以中書令樞密使悉
總天下兵馬諸王駙馬各道總兵將吏一應軍機政務
生殺予奪事無輕重如出朕裁其擴廓帖木兒總領本
部軍馬自潼關以東肅清江淮李思齊總統本部軍馬
自鳳翔以西與侯伯顏達世進取川蜀以少保禿魯爲
陝西行中書省左丞相本省駐劄總本部及張良弼孔
興脫列伯各枝軍馬進取襄樊王信本部軍馬固守信
地別聽調遣詔書到日汝等悉宜洗心滌慮同濟時艱
庚戌朔高殺衛輝守禦官余仁輔彰德守禦官范國英
引軍至清化聞懷慶有備遂還彰德上䟽言人臣以尊
君爲本以盡忠爲心以愛民爲務今總兵官擴廓帖木
兒歲與官軍讎殺臣等乃朝廷培養之人素知忠義焉

能俛首聽命乞降明詔別選重臣以總大兵詔以擴廓帖木兒不遵君命宜黜其兵權就令貊高討之辛亥帖木兒不花進封淮王賜金印設王傅等官壬子爲皇太子立大撫軍院秩從一品知院四員同知二員副使同僉各一員經歷都事各二員管勾一員癸丑封太師伯撒里朮平王甲寅以右丞相完者帖木兒翰林承旨谷爾麻平章政事完者帖木兒並知大撫軍院事丙辰完者帖木兒言大撫軍院專掌軍機今後迤北軍務仍舊制樞密院管其餘內外諸王駙馬各處總兵統兵行省行院宣慰司一應軍情不許隔越徑行移大撫軍院詹

事院同知李國鳳同知大撫軍院事叅政完者帖木兒爲副使左司員外郎咬住樞密叅議王弘遠爲經歷庚申完者帖木兒言諸軍將士有能用命効力建立奇功者請所賞宣勅依常制外加以忠義功臣之號從之辛酉以完者帖木兒仍前少師知樞密院事也速仍前太保中書右丞相帖里帖木兒以太尉添設中書左丞相丙寅立行樞密院于阿難峇察罕腦兒命陝西行省左丞相禿魯仍前少保兼知行樞密院事壬辰命帖里帖木兒仍前太尉左丞相爲知太撫軍院事中書右丞陳敬伯爲中書平章政事九月甲戌朔義士戴晉生上皇

太子書言治亂之由命右丞相也速以兵往山東命叅
知政事法都忽刺分戶部官一同供給丁亥以兵起迤
南百姓供給繁重其真定河南陝西山東冀寧等處除
軍人自耕自食外與免民間今年田租之半其餘雜犯
一切住罷辛巳

大明兵取平江路執張士誠乙酉

大明兵取通州丁亥

大明兵取無錫州巳丑詔也速以中書右丞相分省山
東沙藍谷里以中書左丞相分省大同丙申太師汪家
奴追封亮王謚忠靖巳亥命帖里帖木兒提調端本堂
及領經筵事辛丑

大明兵取台州路時台州温州慶元三路皆方國瑄所
據冬十月甲辰朔貊高以兵入山西定孟州忻州下遼
州遂攻真定詔也速自河間以兵會貊高取真定巳而
不克命也速還河間貊高還彰德乙巳皇太子奏以淮
南行省平章政事王信爲山東行省平章政事兼知行
樞密院事立中書分省于真定路丙午加司徒淮南行
省平章政事王宣爲沂國公丁未享于太廟壬子詔擴
廓帖木兒落太傅中書左丞相并諸兼領職事仍前河
南王錫以汝州爲其食邑其弟脫因帖木兒以集賢學

元史卷四十一 本紀 八
士同擴廓帖木兒於河南府居其帳前諸軍命璘住虎
林赤一同統之其河南諸軍命中書平章政事內史李
克彝統之關保本部諸軍仍舊統之山東諸軍命太保
中書右丞相也速統之山西諸軍命少保中書左丞相
沙藍答里統之河北諸軍命知樞密院事貊高統之赦
天下甲寅以火里赤爲中書平章政事乙丑命集賢大
學士丁好禮爲中書添設平章政事丙寅平章內史關
保封許國公己巳

大明兵取温州十一月壬午

大明兵取沂州守臣王信遁其父宣被執癸未

大明兵取慶元路丙戌以平章政事月魯帖木兒知樞
密院事完者帖木兒平章政事伯顏帖木兒帖林沙並
知撫軍院事戊子

大明兵取嶧州乙未以知樞密院事貊高爲中書平章
政事命大尉中書左丞相帖里帖木兒爲撫軍院使丁
酉命帖里帖木兒同監修國史命關保分省于晉寧辛

丑

大明兵取益都路平章政事保保降宣慰使普顏不花
總管胡濬知院張俊皆死之十二月癸卯朔日有食之
丁未

大明兵取般陽路戊申

大明兵取濟寧路陳秉直遁巳酉

大明兵取萊州遂取濟南及東平路丁巳

大明兵入杉關取邵武路時邵武建寧延平福州興化
泉漳汀潮諸路皆陳友定所據庚申以楊誠陳秉直並
爲國公中書平章政事甲子命右丞相也速太尉知院
脫火赤中書平章政事忽林台平章政事額高知樞密
院事小章典堅帖木兒江文清驢兒等會楊誠陳秉直
伯顏不花俞勝各部諸軍同守禦山東又命關保往援
山東丙寅以莊家爲中書叅知政事庚午

大明兵由海道取福州守臣平章政事曲出遁行宣政
院使朶兒死之是月方國珍歸於

大明詔命陝西行省左丞相禿魯總統張良弼脫列伯
孔興各枝軍馬以李思齊爲副總統禦關中撫安軍民
脫列伯孔興等出潼關及取順便山路渡黃河合勢東
行共勤王事思齊等皆不奉命是歲詔分潼關以西屬
李思齊以東屬擴廓帖木兒各罷兵還鎮于是關保退
屯潞州商曷留屯潼關

二十八年春正月壬申朔皇太子命關保固守晉寧總
統諸軍如擴廓帖木兒拒命當以大義相裁就便擒擊

以中書平章政事不顏帖木兒爲御史大夫辛巳詔諭
擴廓帖木兒曰比者也速上奏卿以書陳情深自悔悟
及省來意良用惻然朕視卿猶子卿何惑於儉言不體
朕心隳其先業卿今能自悔固朕所望卿其思昔委任
肅清江淮之意卽將冀寧真定諸軍就行統制渡河直擣
徐沂以康靖齊魯則職任之隆當悉還汝衛輝彰德順
德皆爲王城鄉無以貂高爲名縱軍侵暴其晉寧諸軍
已命關保總制策應戡定山東將帥各宜悉心庚寅彗
星見于昴畢之間是月

大明兵取建寧延平二路陳友定被執二月壬寅朔詔
削擴廓帖木兒爵邑命禿魯李思齊等討之詔曰擴廓
帖木兒本非察罕帖木兒之宗俾嗣職任冀承遺烈昇
以相位陟以師垣崇以王爵授以兵柄顧乃憑藉寵靈
遂肆跋扈構兵關陝專事吞併貂高倡明大義首發姦
謀關保弗信邪言乃心王室陳其罪惡請正邦典今禿
魯李思齊其率兵東下共行天討癸卯武庫災癸丑
大明兵取東昌路守將申榮王輔元死之丙辰擴廓帖
木兒自澤州退守晉寧關保守澤潞二州與貂高軍合
巳未

大明兵取寶慶路甲子汀州路總管陳谷玠以城降于

大明丙寅

大明兵取棣州是月

大明兵至河南李思齊張良弼等解兵西還詔命知樞密院事脫火赤平章政事魏賽因不花進兵攻晉寧李思齊次渭南張良弼次櫟陽興化泉州漳州潮州四路皆降于

大明二月庚寅彗星見于西北壬辰翰林學士承旨王時太常院使陳祖仁上章乞撫諭擴廓帖木兒以兵勤王赴難是月有星流于東北衆小星隨之其聲大震

大明兵取河南李思齊張良弼會兵駐潼關火焚良弼

營思齊移軍葫蘆灘調其所部張德斂穆薛飛守潼關

大明兵入潼關攻李思齊營思齊棄輜重奔于鳳翔是月

大明兵取永州路又取惠州路夏四月辛丑朔

大明兵取英德州丙午隕霜殺菽戊申

大明兵取廣州路又取嵩陝汝等州五月庚午朔

大明兵取道州李克彝棄河南城奔陝西推李思齊爲總兵駐兵岐山是月李思齊部將忽林赤脫脫張意據

蓋屋商高據武功李克彝據岐山任從政據隴州六月

庚子朔徐溝縣地震癸丑

大明兵取全州郴州梧州藤州尋州貴象鬱林等郡甲寅雷雨中有火自天墜焚大聖壽萬安寺壬戌臨州保德州地震五日不止

大明兵取靜江路是月廣西諸郡縣皆附于

大明秋七月癸酉京城紅氣滿空如火照人自旦至辰方息乙亥京城黑氣起百步內不見人從寅至巳方息

狃高關保以兵攻晉寧是月李思齊會李克彝商嵩張意脫列伯等於鳳翔海南海北諸郡縣皆降于

大明閏月巳亥朔擴廓帖木兒與狃高關保戰敗之擒關保狃高遣其斷事官以聞詔關保狃高間諜搆兵可依軍法處治關保狃高皆被殺辛丑

大明兵取衛輝路癸卯

大明兵取彰德路乙巳左江右江諸路皆降于

大明丁未

大明兵取廣平路丁巳詔罷大撫軍院誅知大撫軍院事伯顏帖木兒等詔復命擴廓帖木兒仍前河南王太傅中書左丞相統領見部軍馬由中道直抵彰德衛輝太保中書右丞相也速統率大軍經由東道水陸並進少保陝西行省左丞相禿魯統率關陝諸軍東出潼關攻取河洛太尉平章政事李思齊統率軍馬南出七盤

金商克復汴洛四道進兵犄角勦捕毋分彼此秦國公
平章知院俺普平章瓚住等軍東西布列乘機掃殄太
尉遼陽左丞相也先不花郡王知院厚孫等軍捍禦海
口藩屏畿輔皇太子愛猷識理達臘悉總天下兵馬裁
決庶務具如前詔壬戌白虹貫日癸亥罷內府河役甲
子擴廓帖木兒自晉寧退守冀寧

大明兵至通州知樞密院事卜顏帖木兒力戰被擒死
之左丞相失列門傳旨令太常禮儀院使阿魯渾等奉
太廟列室神主與皇太子同北行阿魯渾等卽至太廟
與署令王嗣宗太祝哈刺不花襲護神主畢仍留室內

乙丑白虹貫日罷內府興造詔准王帖木兒不花監國
慶童爲中書左丞相同守京城丙寅帝御清寧殿集三
宮后妃皇太子皇太子妃同議避兵北行失列門及知
樞密院事黑厮宦者趙伯顏不花等諫以爲不可行不
聽伯顏不花慟哭諫曰天下者世祖之天下陛下當以
死守奈何棄之臣等願率軍民及諸怯薛反出城拒戰
願陛下固守京城卒不聽至夜半開健德門北奔八月
庚申

大明兵入京城國亡後一年帝駐于應昌府又一年四
月丙戌帝因痢疾殂于應昌壽五十一在位二十六年

太尉完者院使觀音奴奉梓宮北葬五月癸卯
大明兵襲應昌府皇孫買的里八剌及后妃并寶玉皆
被獲皇太子愛猷識理達臘從十數騎遁
大明皇帝以帝知順天命退避而去特加其號曰順帝
而封買的里八剌爲崇禮侯

紀卷第四十七終

